

Rom

Pas Pol i raitim long ol lain bilong
God i stap long taun Rom.

Tok Pisin ©2015 J Glenn Calderwood
www.pngbiblesources.org

Rom

Pas Pol i raitim
long ol lain bilong God i stap long taun Rom.

Pol i putim em yet long ples klia.

1 ¹ Nem bilong mi Pol. Mi wokboi nating bilong Krai Jisas. Em i bin singautim mi na mi kamap aposel, na Em i bin makim mi bilong autim gutnius bilong God. ² Bipo yet God i bin tokim ol profet bilong Em na promisim dispela gutnius. Dispela gutnius i stap pinis long Buk bilong God. ³ As bilong gutnius em i PIKININI bilong God. Em i bin kamap insait long lain bilong Devit. ⁴ Tasol taim Em i kirap bek long matmat Holi Spirit bilong God i soim yumi olsem Em i strongpela PIKININI bilong God. Olsem na, Jisas Krai Em i Bikpela bilong yumi. ⁵ Long wok bilong Krai, na bilong litimapim nem bilong Em, God i bin mekim grasia long mipela na givim wok aposel long mipela. Em i mekim olsem bilong singautim wan wan manmeri bilong olgeta kantri na bai ol i bilipim Em na bihainim olgeta tok bilong Em. ⁶ Na yupela tu i stap insait long dispela lain God i singautim bilong pas wantaim Jisas Krai.

⁷ Mi raitim dispela tok i go long ol lain bilong God i stap long Rom. Ol dispela lain God i lavim na singautim bai ol i stap lain bilong God.

God, Papa bilong yumi na BIKPELA Jisas Krai, tupela i ken i mekim grasia long yupela na mekim bel isi long yupela.

Pol i laik lukim ol lain bilong God i stap long Rom.

⁸ Pastaim, long nem bilong Jisas Kraiss, mi tok tenkyu long God bilong mi long yupela olgeta. Long olgeta hap ol manmeri i stori long bilip bilong yupela, na long dispela as mi givim tenkyu long God. ⁹⁻¹⁰ Olgeta taim mi yusim olgeta strong bilong mi bilong mekim wok bilong God na mi autim gutnius bilong PIKININI bilong God. Na God Em i wtnis bilong mi. Olsem na, God i save, olgeta taim mi holim tingting long yupela taim mi mekim prea. Mi save prea na nau i luk olsem rot i op na God i orait long mi ken i kam long yupela. ¹¹ Holi Spirit i ken i yusim mi bilong strongim yupela, na long dispela as mi laik kam lukim yupela. ¹² Mi tingim olsem yumi ken i stori gut long bilip bilong yumi na dispela i ken i strongim yumi wantaim. ¹³ Ol brata, yupela mas kliia olsem planti taim mi bin tingting long kam long yupela, tasol olgeta taim ol sampela samting i pasim mi. Olsem na, mi laik kam bilong kamapim gutpela kaikai namel long yupela wankain olsem mi bin mekim long ol narapela lain Jentail. ¹⁴ God i makim mi bilong mekim wok long ol lain Grik na bilong ol kanaka tu. Em i makim mi bilong mekim wok long ol save lain na bilong ol lain i no gat save wantaim. ¹⁵ Olsem na, long dispela as mi strong long kam long yupela ol lain Rom na autim gutnius long yupela.

God i givim stretpela pasin.

¹⁶ Mi no sem long gutnius bilong Kraiss. Long wanem, dispela gutnius em i strong bilong God bilong kisim bek manmeri i bilipim gutnius. Pastaim gutnius i kamap long ol lain Juda, tasol nau em i kamap long ol lain Jentail tu. ¹⁷ Long gutnius stretpela pasin God i givim manmeri em i kamap ples kliia. Dispela stretpela pasin God i givim manmeri em i kam long wanpela rot tasol. Na dispela rot em i rot bilong bilipim gutnius. Dispela kain

tok i stap pinis long Buk bilong God na i tok, "*Manmeri i stretpela long rot bilong bilipim God bai i stap laip.*" (Habakuk 2:4)

God Em i bel hat long olgeta manmeri.

¹⁸⁻²⁰ God bilong heven i putim bel hat bilong Em long ples klia. Em i bel hat long ol pasin we ol manmeri i save givim baksait long Em, na Em i bel hat long ol pasin nogut bilong ol. God i stap oltaim oltaim na Em i gat strong. Na God Em i God tru tru. Na taim God i bin wokim dispela graun Em i putim ol dispela samting long ples klia. Ol manmeri ol i lukim ol samting God i bin wokim, na ol inap klia na ol inap save long God. Tasol taim ol i mekim pasin nogut ol i karamapim dispela save God i givim ol, na long dispela as God Em i bel hat. Em olsem na ol manmeri ol i no inap toktok. ²¹ Ol manmeri ol i save pinis long God, tasol ol i no aninit long Em na ol i no tok tenkyu long Em. Tingting bilong ol i paul na ol i no yusim het. Olsem na, tingting bilong ol i stap long tudak. ²² Ol i tingim olsem, "Mipela i save lain stret." Tasol nogat. Ol i paul lain tasol. ²³ Ol i givim baksait long glori bilong trupela God i no inap i dai. Na ol i putim tingting bilong ol i go long ol samting ol yet i bin wokim. Ol i save wokim imis samting olsem man i save dai na olsem ol pisin na ol animal nabaut.

²⁴ Olsem na, long dispela as God Em i larim ol dispela manmeri na ol i bihainim laik bilong ol yet. Em olsem na ol i mekim marit pasin i paul olgeta na mekim nogut long bodi bilong ol yet. ²⁵ Ol i lusim trupela save bilong God na kisim ol giaman save. Olsem na, ol i lotuim na aninit long ol samting God i bin wokim, na ol i no tingting long lotuim na aninit long God. God wanpela i gat biknem na i stap oltaim oltaim. Tru tumas.

²⁶ Long dispela as God Em i larim ol dispela manmeri na ol i stap long pasin bilong sem. Em olsem na ol meri ol i lusim gutpela marit pasin na ol i mekim pasin i no gutpela wantaim

narapela meri. ²⁷ Na wankain olsem, ol man ol i lusim marit pasin wantaim meri na bel bilong ol i kirap long ol narapela man tasol. Ol dispela kain man ol i mekim pasin bilong sem wantaim ol narapela man. Ol i mekim olsem na ol yet i kisim pe stret inap long paul pasin ol i mekim.

²⁸ Ol dispela manmeri ol i no laik holimpas trupela save bilong God. Na long dispela as God Em i larim ol i stap long tingting nogut na long mekim pasin i no stret. ²⁹ Olsem na, ol kain kain pasin nogut, na pasin i rong olgeta, na pasin we ol i tingting tasol long kisim ol planti samting, na pasin we tingting nogut i stiaim ol, na ol jelas pasin, na pasin bilong kilim man i dai, na pasin bilong kros pait, na pasin bilong giaman, na pasin bilong mekim nogut long ol narapela manmeri, ol dispela kain pasin i pulap long ol. Ol i save tok baksait na daunim narapela manmeri, ³⁰ na ol i save tok giaman bilong bagarapim ol narapela manmeri, na ol i save hetim God, na ol i save bikhet na apim ol yet, na ol i save kamapim ol nupela wei bilong mekim pasin i rong olgeta, na ol i save sakim tok bilong papamama bilong ol. ³¹ Ol i no yusim het, na ol i no save bihainim tok bilong ol yet, na ol i no save sori long narapela manmeri, na ol i no save tingting taim ol i bagarapim ol narapela manmeri. ³² Na ol dispela kain lain ol i klia pinis long stretpela tok bilong God. God i tok, "Manmeri i mekim ol dispela kain pasin nogut, pe bilong ol em i dai." Em olsem tasol ol i no lusim pasin nogut. Nogat. Ol i mekim i go yet, na tu ol i save sapatim ol narapela manmeri i laik mekim olsem.

Stretpela skelim bilong God.

2 ¹ Olsem na, yupela lain bilong sutim tok long ol narapela manmeri yupela no inap toktok. Long wanem, yupela i mekim wankain pasin ol i save mekim. Na taim yupela sutim tok long ol, yupela sutim tok long yupela yet. Long wanem, yupela i

mekim wankain pasin ol i mekim. ² Yumi save pinis, God i skelim stret na Em i makim pe nogut bilong ol manmeri i mekim pasin nogut. ³ Yupela manmeri, yupela save sutim tok long ol narapela manmeri, tasol yupela i mekim wankain pasin ol i mekim. Na olsem wanem yupela tingim God i no inap makim pe nogut long yupela? ⁴ God Em i mekim gutpela pasin tru long yupela na Em i bel isi long yupela na wetim yupela. Tasol yupela tingim ol dispela samting em i samting nating. Yupela no klia olsem ol dispela gutpela pasin bilong God em bilong givim tingting long yupela na bai yupela tanim bel. ⁵ Tasol yupela pasim tingting pinis na yupela no tanim bel. Na long dispela as i olsem yupela hipim pe nogut bilong yupela yet. Na bai yupela kisim dispela pe nogut long de bilong bel hat bilong God. Long dispela de olgeta manmeri bai lukim stretpela skelim bilong God.

⁶ God "*bai tilim samting long olgeta manmeri inap long pasin ol i bin mekim.*" (Buk Song 62:12, Sindaun 24:12) ⁷ Olsem na, manmeri i strong long bihainim gutpela pasin i go i go bilong kisim glori na bilong kisim gutpela nem na bilong kisim laip, orait God bai givim laip i stap oltaim oltaim long ol. ⁸ Tasol sampela manmeri ol i amamasim skin bilong ol yet na ol i givim baksait long trupela tok na ol i save mekim pasin nogut. Long dispela kain manmeri God bai bel hat na givim pe nogut long ol. ⁹ Trabel na hevi bai kamap long olgeta manmeri i save mekim pasin i no stret. Na dispela i ken i kamap long ol lain Juda pastaim na long ol lain Jentail tu. ¹⁰ Tasol ol manmeri i bihainim gutpela pasin ol bai kisim glori na gutpela nem na bel isi. Na dispela i ken i kamap long ol lain Juda pastaim na long ol lain Jentail tu. ¹¹ Harim, God i save skelim olgeta manmeri long wankain pasin tasol, maski ol i bilong wanem lain.

Lo bilong God na skelim bilong God.

¹² Sampela manmeri ol i no save long lo na ol i mekim sin na ol bai lus maski ol i no save long lo. Na sampela manmeri i aninit long lo na ol i mekim sin na God bai yusim lo bilong kotim ol na tilim pe nogut long ol. ¹³ Yupela no ken i tingim olsem manmeri i save harim tok bilong lo ol i stretpela long ai bilong God. Nogat. Manmeri i save mekim na bihainim lo em i dispela manmeri tasol i stretpela long ai bilong God. ¹⁴⁻¹⁵ Harim, ol lain Jentail ol i no save long lo. Tasol taim ol i kisim tingting na ol i mekim sampela gutpela pasin i stap insait long lo, em nau ol i bihainim lo. Na taim ol i bihainim gutpela pasin i stap insait long lo, orait i klia olsem tok bilong lo i stap pinis long tingting bilong ol na long bel bilong ol. Em olsem na taim ol i mekim pasin nogut ol i klia olsem ol i mekim pasin nogut. Na taim ol i mekim gutpela pasin ol i klia olsem ol i mekim gutpela pasin. ¹⁶ Olsem na, God bai skelim olgeta tingting na pasin bilong ol manmeri. Em i givim dispela wok long Jisas Krais, na Em bai skelim olsem long de God i makim pinis. Na dispela tok i stap pinis insait long gutnius mi save autim.

¹⁷ Yupela ol Juda, yupela i stap aninit long lo na yupela toktok planti olsem, "Mipela gutpela lain bilong God." ¹⁸ Yupela kisim skul pinis long lo, na long dispela as yupela klia pinis long laik bilong God na yupela klia long wanem samting i gutpela samting. ¹⁹ Yupela pilim olsem yupela save lain stret na yupela inap soim rot long ol aipas lain. Yupela tingim olsem yupela i stap long tulait na yupela inap soim rot long ol lain i stap long tudak. ²⁰ Yupela tingim olsem yupela inap skulim ol lain i no gat save na skulim ol pikinini. Na yupela kisim lo pinis na yupela tingting olsem, "Mipela save long as bilong olgeta tok bilong God." ²¹ Orait, yupela save skulim ol narapela manmeri, tasol olsem wanem yupela no skulim yupela yet? Yupela save autim

tok olsem, "Yu no ken stil". Tasol yupela stil. ²² Yupela save tok olsem, "Yu no ken mekim pasin pamuk." Tasol yupela mekim pasin pamuk. Yupela hetim ol giaman god. Tasol yupela save kisim kago bilong ol. ²³ Yupela toktok planti long lo, tasol yupela save sakim lo. Long dispela as yupela givim sem long God.

²⁴ Dispela kain tok i stap pinis long Buk bilong God na i tok, "*Ol lain Jentail ol i save lukim dispela pasin bilong yupela na ol i tok bilas na daunim nem bilong God.*" (Aisaia 52:5, Esekiel 36:22)

²⁵ Sapos yupela bihainim lo tru tru, orait pasin bilong katim skin em i gutpela. Tasol sapos yupela sakim lo, orait pasin bilong katim skin em i samting nating na yupela i stap olsem ol lain i no katim skin. ²⁶ Tasol sapos ol lain i no save katim skin ol i bihainim lo tru tru, orait God bai tingim olsem ol i trupela lain na ol i stap olsem ol i katim skin pinis. ²⁷ Olsem na, yupela kisim pinis lo na pasin bilong katim skin, tasol yupela lain bilong sakim lo. Orait, ol manmeri i no katim skin, tasol ol i bihainim lo tru tru, ol inap daunim yupela. ²⁸⁻²⁹ Sapos wanpela man em i man Juda long antap skin tasol, orait em i no man Juda tru tru. Nogat. Sapos em i man Juda long bel, orait em i man Juda tru tru. Na wankain olsem long sait bilong katim skin. Em i no samting bilong antap skin. Nogat. Em i samting bilong bel na samting Holi Spirit i save mekim long manmeri. Olsem na, dispela kain man em i no save litimapim nem bilong em yet. Nogat. Em i save litimapim nem bilong God.

Pol i bekim komplem bilong ol sampela man.

3 ¹ Orait, ol manmeri bilong Juda ol i kamap insait long gutpela samting o nogat? Na pasin bilong katim skin em i gutpela samting bilong ol o nogat? ² Yes, ol dispela samting em i gutpela samting bilong ol. Na nambawan samting i olsem, God i bin givim tok bilong Em long ol dispela lain Juda. ³ Em inap, tasol

sapos sampela manmeri bilong ol lain Juda i givim baksait long tok bilong God, orait dispela pasin i olsem wanem? Bai dispela pasin i mekim ol promis bilong God i kamap samting nating, a? ⁴ Nogat tru! God i no man bilong giaman. Nogat. Ol manmeri tasol ol i lain bilong giaman. Dispela kain tok i stap pinis long Buk bilong God na i tok,

"Olsem na, taim Yu toktok Yu save mekim trupela tok olgeta, na taim Yu skelim kot Yu save skelim stret." (Buk Song 51:4)

⁵ Tasol sampela manmeri ol i gat tingting. Na ol i tingim sin pasin bilong yumi i save mekim stretpela pasin bilong God i kamap ples klia. Na long dispela as ol i tingim olsem God i no mekim stretpela pasin long yumi taim Em i bel hat na bekim pe nogut long sin bilong yumi. Yupela save, mi bihainim tingting bilong ol man na mi toktok. ⁶ Harim, God i mekim stretpela pasin long yumi, na Em bai kotim olgeta manmeri bilong dispela graun. ⁷ Na sampela manmeri i tingim tok giaman bilong ol i save mekim trupela tok bilong God i kamap ples klia. Na ol i tingim dispela pasin i save givim biknem long God. Na long dispela as ol i tingim olsem, "God i no ken i daunim yumi long dispela pasin."

⁸ Tasol dispela tingting bilong ol i paul wankain dispela tok, "Kam, yumi mekim pasin nogut bilong kamapim ol gutpela samting." Na sampela manmeri i tingim mipela i save autim dispela kain toktok. Tasol nogat tru. Em olsem na God i ken daunim manmeri i mekim ol dispela paul toktok.

I no gat wanpela stretpela man i stap.

⁹ Orait, bai mipela tok wanem? Mipela i winim ol narapela manmeri, a? Nogat tru! Yumi klia olsem sin i karamapim yumi olgeta, yumi ol lain Juda na ol lain Jentail wantaim. ¹⁰ Dispela kain tok i stap pinis long Buk bilong God na i tok,

"I no gat wanpela manmeri i stretpela, nogat tru.

¹¹ *I no gat wanpela manmeri i gat gutpela tingting, na i no gat wanpela manmeri i save bihainim God.*

¹² *Olgeta manmeri ol i bin givim baksait long God, olsem na, olgeta i kamap manmeri nogut.*

I no gat wanpela manmeri i save mekim gutpela pasin.

Tru, i no gat wanpela."

(Buk Song 14:1-3, 53:1-3, Saveman 7:20)

¹³ *"Maus bilong ol i olsem matmat i op i stap, na ol i save mekim tok giaman." (Buk Song 5:9)*

"Long maus bilong ol, ol i save bagarapim ol manmeri."

(Buk Song 140:3)

¹⁴ *"Tok kros na tok swea i pulap long maus bilong ol." (Buk Song 10:7)*

¹⁵ *"Ol i hariap long bihainim pasin bilong kilim man i dai.*

¹⁶ *Sindaun nogut na hevi em i mak bilong ol.*

¹⁷ *Na ol i no save long pasin bilong bel isi." (Aisaia 59:7,8)*

¹⁸ *"Ol i no save pret long God." (Buk Song 36:1)*

¹⁹ Yumi save pinis, olgeta tok lo i mekim em i mekim long ol manmeri i stap aninit long lo. Na tok bilong lo i stap bilong pasim maus bilong olgeta manmeri, bai olgeta manmeri bilong olgeta hap bilong dispela graun i sanap long kot bilong God.

²⁰ Long wanem, i no gat wanpela manmeri bai i kamap stretpela manmeri long ai bilong God long rot bilong bihainim lo. Nogat. Long rot bilong bihainim lo ol manmeri bai klia long sin bilong ol yet na em tasol.

Stretpela pasin i kam long rot bilong bilip.

²¹ Tasol nau, stretpela pasin God i givim manmeri em i kamap ples klia pinis. Na Buk Lo na Buk Profet i save tokaut long dispela stretpela pasin God i givim. Dispela stretpela pasin em i no kamap long rot bilong bihainim lo. Nogat. ²² Stretpela pasin

God i givim manmeri em i kamap long feitful wok bilong Jisas Krai. God i save givim dispela stretpela pasin long ol manmeri i bilipim na trastim Jisas Krai. Olgeta manmeri ol i wankain tasol. ²³ Ol i manmeri bilong mekim sin, na ol i kamap sot long glori bilong God. ²⁴ Na God i ken i kolim ol "stretpela man" long wok Krai Jisas i bin mekim bilong baim bek manmeri. Dispela em i presen bilong God, na i kam long rot bilong grasia bilong God. ²⁵ God i bin salim Krai Jisas i kam, na Krai Jisas i kisim pe bilong sin na Em i dai, na blut bilong Em i kapsait bilong tekewe bel hat bilong God long sin bilong manmeri i bilipim na trastim Krai Jisas. Na God i mekim ol dispela samting bilong soim olsem, pasin bilong Em i stret olgeta. Long wanem, long bipo ol lain bilong God i bin mekim sin na God i bin lukim, tasol Em i bin larim ol. ²⁶ Em olsem na nau God i soim olsem, pasin Em i mekim i stret olgeta. God Em i stretpela God olgeta, na Em i givim stretpela pasin long manmeri i bilip na Em i kolim ol "stretpela man".

²⁷ Orait, husat i ken i apim em yet? Em i no gat wanpela manmeri i ken i apim em yet. Long wanem, dispela kain pasin i pinis. Na wanem samting i pinisim dispela kain pasin? Pasin bilong bihainim lo i no pinisim dispela pasin. Nogat. Pasin bilong bilip tasol i pinisim. ²⁸ Long wanem, yumi klia olsem God i no inap kolim yumi "stretpela man" long wok bilong yumi long bihainim lo. Nogat tru. Long rot bilong bilip tasol God i givim stretpela pasin long yumi na kolim yumi "stretpela man". ²⁹ God Em i no God bilong ol lain Juda tasol. Nogat. God Em i God bilong ol lain Jentail tu. ³⁰ Long wanem, God Em i wanpela tasol. Olsem na, ol manmeri i bilipim na trastim Jisas, dispela wanpela God bai givim stretpela pasin long ol na kolim ol "stretpela man", maski ol i manmeri Juda o ol i manmeri Jentail. ³¹ Orait, yumi

ken i tok wanem, ol dispela samting i pundaunim lo, a? Nogat tru! Ol dispela samting i sapotim lo.

God i givim stretpela pasin long Abraham.

4 ¹ Orait, Abraham, tumbuna bilong yumi, em olsem wanem? ² Sapos Abraham i mekim stretpela pasin na long dispela as God i kolim em "stretpela man", orait Abraham em i ken i apim em yet long ai bilong God. Tasol em i no mekim olsem. ³ Tok bilong God i tok wanem? Em i tok, "*Abraham i bilipim God na God i givim nating na givim stretpela pasin long em.*" (Jenesis 15:6) ⁴ Taim wanpela man i mekim wok bilong kisim pe, orait dispela pe em i no presen. Nogat. Dispela pe em i bekim bilong wok bilong em. ⁵ God Em i God bilong givim stretpela pasin long ol nogut manmeri na kolim ol "stretpela man". Em olsem na taim wanpela man i no mekim stretpela pasin, tasol em i bilipim na trastim dispela God, orait God bai givim nating na givim stretpela pasin long em. ⁶ Devit i bin tokaut long dispela samting tu. Em i tokaut long manmeri i no bin mekim stretpela pasin, tasol God i bin givim stretpela pasin long ol. Olsem na, ol dispela manmeri i gat bikpela amamas. Devit i mekim dispela tok,

⁷ "*Manmeri i kisim amamas tru,
ol i manmeri God i fogivim olgeta rong bilong ol
na Em i karamapim olgeta sin bilong ol.*

⁸ *Man i kisim amamas tru,
em i man BIKPELA i no tingting moa
long sin bilong em.*" (Buk Song 32:1,2)

⁹ Na dispela blesim bilong God, em bilong ol manmeri i katim skin tasol o em bilong ol narapela manmeri tu, a? Yumi save pinis, Abraham i bilipim na trastim God na God i givim

nating na givim stretpela pasin long em. ¹⁰ Orait, em olsem wanem? Abraham i katim skin pastaim na God i givim stretpela pasin long em, a? Nogat. God i givim stretpela pasin long Abraham pastaim na bihain Abraham i katim skin. ¹¹ Em olsem na bihain Abraham i katim skin bilong soim olsem em i kisim pinis stretpela pasin God i givim em. I klia olsem, taim Abraham i no katim skin yet em i kamap "stretpela man" pinis long ai bilong God. Long dispela as Abraham em i papa bilong ol manmeri i bilip na i no katim skin. God bai givim nating na givim stretpela pasin long ol. ¹² Na tu Abraham em i papa bilong ol manmeri i katim skin na i holim wankain bilip Abraham i holim taim em i no katim skin yet.

Kaikai bilong promis i kam long rot bilong bilip.

¹³ God i bin givim promis long Abraham na long ol pikinini bilong em. God i promis long givim olgeta samting long Abraham na long ol pikinini bilong em. Abraham i no bihainim sampela kain lo na God i mekim dispela promis. Nogat. Abraham i bilipim God, na God i givim stretpela pasin na kolim em "stretpela man", na long dispela rot promis bilong God i kam long Abraham.

¹⁴ Olsem na, sapos promis i kam long ol manmeri i bihainim lo, orait bilip i no gat wok na promis em i samting nating. ¹⁵ Long wanem, God i save bel hat na bekim pe nogut long manmeri i sakim lo. Tasol, sapos lo i no stap, orait manmeri i no inap sakim lo.

¹⁶ God i mekim grasia na Em i givim promis. Em olsem na promis em i kam long rot bilong bilip. Long dispela as i tru tumas, God bai givim olgeta samting bilong promis long ol pikinini bilong Abraham. Olgeta manmeri i bilip wankain olsem Abraham i bilip, ol bai kisim ol samting bilong promis, maski ol i lain bilong lo o ol i narapela lain. Olsem na, Abraham em i papa bilong

olgeta manmeri i bilip. ¹⁷ Dispela kain tok i stap pinis long Buk bilong God na i tok, "*Mi mekim yu papa bilong planti lain manmeri.*" (Jenesis 17:5) Long ai bilong God Abraham em i papa bilong yumi. Na dispela God Abraham i bilipim na trastim Em i God bilong givim laip long man i no gat laip, na Em i God bilong kamapim ol kain kain samting i no kamap yet. ¹⁸ Pastaim i luk olsem Abraham i no inap kamap papa bilong wanpela pikinini na i no inap kamap papa bilong planti manmeri. Tasol em i tingting long promis na em i bilipim na trastim God. God i bin tokim Abraham olsem, "*Ol lain bilong yu bai kamap planti tru olsem ol sta.*" (Jenesis 15:5) ¹⁹ Abraham i bin kisim klostu 100 krismas pinis, na em i save olsem em i lapun pinis na strong bilong em i lus pinis. Na em i save olsem Sara tu em i lapun pinis na em i no inap karim wanpela pikinini. Abraham em i klia long ol dispela samting, tasol em i bilipim na trastim God i go yet. ²⁰ Na taim em i tingting long promis bilong God em i no tingim God Em i giaman. Nogat. Na Abraham em i no tubel. Nogat. Em i kamap strong moa yet long bilipim na trastim God na em i litimapim nem bilong God. ²¹ Abraham em i holim wanpela strongpela tingting tasol. Na dispela tingting i olsem, God i gat strong na Em inap tru long kamapim dispela samting Em i bin promisim. ²² Na long dispela as "*God i givim nating na givim stretpela pasin long em.*" ²³ Dispela tok, "*God i givim nating na givim stretpela pasin long em,*" i no kamap bilong givim tingting long Abraham tasol. Nogat. ²⁴ Dispela tok i kamap bilong givim tingting long yumi tu. Long wanem, God bai givim nating na givim stretpela pasin tu long yumi i bilipim na trastim God, em dispela God i bin kirapim Jisas, BIKPELA bilong yumi. ²⁵ God i bin givim Jisas, bai Jisas i dai bilong sin bilong yumi. Na God Em i kirapim Jisas gen bilong Em i ken i kolim yumi "stretpela man".

Bel isi na amamas i kamap.

5 ¹ Long rot bilong bilip God i givim stretpela pasin long yumi na kolim yumi "stretpela man". Long dispela as, nau God Em i stap bel isi wantaim yumi. Dispela bel isi bilong God i kam long yumi long wok bilong BIKPELA Jisas Krai. ² BIKPELA Jisas Krai, long wok bilong Em, Em i kisim yumi i kam insait long grasia bilong God, na long rot bilong bilip nau yumi i stap insait long dispela grasia. Na yumi save amamas. Long wanem, nau yumi klia olsem yumi bai lukim glori bilong God. ³ Na tu, nau yumi amamas taim yumi kisim sampela hevi. Long wanem, yumi klia olsem hevi bai mekim yumi kamap strong. ⁴ Na dispela strong bai mekim yumi kamap manmeri i gat gutpela save na strongpela tingting. Em olsem na bai yumi bilip strong na wetim promis bilong God. ⁵ Na yumi i bilip strong na i wetim promis bilong God, yumi no inap sem. Long wanem, God i bin givim Holi Spirit long yumi, na long wok bilong Holi Spirit insait long laip bilong yumi, bai yumi klia olsem God Em i lavim yumi.

⁶ Tingim. Yumi no gat strong bilong helpim yumi yet. Tasol God i bin makim wanpela taim, na long dispela taim stret Jisas Em i dai bilong helpim manmeri nogut. ⁷ Ating i no gat wanpela bilong yumi bai i lusim laip bilong em bilong helpim wanpela stretpela man. Sapos yumi lukim wanpela gutpela man yumi laikim tumas, orait ating wanpela bilong yumi i ken i strongim bel na i dai bilong helpim em. ⁸ Tasol taim yumi i stap yet insait long sin pasin, Krai Em i dai bilong helpim yumi. Long dispela pasin God i soim yumi olsem Em i lavim yumi. ⁹ Sapos blut bilong Krai i bin kapsait bilong God i ken i kolim yumi "stretpela man", orait i no gat kwesten mak, wok bilong Krai bai sevim yumi na yumi no inap tru long lukim bel hat bilong God. ¹⁰ Bipo yumi birua bilong God. Tasol nau long dai bilong PIKININI bilong God Em i mekim yumi pren bilong Em. Em olsem na, nau

Krais Em i stap laip na tru tumas yumi tu bai i stap laip. ¹¹ Ol dispela samting i tru, na yumi save amamas long God na long BIKPELA Jisas Krais. Long wanem, long wok bilong Krais, God i mekim yumi kamap pren bilong Em pinis.

Adam i kamapim dai na Krais i kamapim laip.

¹² Wanpela man i bin mekim sin. Na long rot bilong dispela man sin i kam long olgeta manmeri. Na sin i bin kamapim dai. Na long dispela as dai em i kam long olgeta manmeri. Long wanem, olgeta manmeri i bin kamap sin manmeri. ¹³ Long dispela taim lo i no kamap yet. Tasol sin i kamap pinis. Na sapos wanpela lo i no kamap yet, orait sin i no inap kamap. ¹⁴ Tasol dai em i stap long taim bilong Adam i go i go long taim bilong Moses. Na sampela manmeri ol i no sakim tok olsem Adam i bin mekim. Tasol ol dispela manmeri tu ol i bin i dai. Olsem na, Adam i olsem wanpela narapela man i kamap bihain long em.

¹⁵ Tasol presen God i givim mipela em i no wankain olsem sin Adam i givim mipela. Nogat. Sin bilong dispela wanpela man Adam i putim mipela planti manmeri insait long dai. Tasol dispela wanpela man Jisas Krais i mekim gutpela wok bilong helpim mipela planti manmeri. Em olsem na God i mekim grasia long mipela na Em i givim presen long mipela, na Em i kapsaitim ol dispela gutpela samting long mipela planti manmeri. ¹⁶ Na tu, presen God i givim mipela na sin Adam i givim mipela em i no kamapim wankain samting long bihain. Nogat. Bikpela kot i kamap bihain long wanpela sin Adam i mekim, na dispela kot i save daunim ol manmeri. Tasol presen bilong God i kamap bihain long planti sin pasin, na dispela presen i kamapim pasin we God i kolim manmeri "stretpela man". ¹⁷ Dispela wanpela man Adam em i bin mekim wanpela sin, na long dispela rot dai i kamap na dai i save stap i go i go. Tasol God i kamapim gutpela wei bilong

helpim manmeri. Em olsem na Em i mekim grasia long ol na Em i givim wanpela presen long ol na dispela presen em i stretpela pasin. Na tru tumas ol manmeri i kisim dispela gutpela grasia na i kisim dispela gutpela presen, bai ol i stap laip i go i go. Na ol dispela gutpela samting em i kamap tasol long wok bilong dispela wanpela man Jisas Kraiss.

¹⁸ Orait, wanpela sin i bin daunim olgeta manmeri na putim ol insait long dai. Na wankain olsem, wanpela stretpela laip i kamapim pasin we God i kolim manmeri "stretpela man" na dispela i kisim laip i kam long ol manmeri. ¹⁹ Wanpela man i bin sakim tok bilong God, na long dispela rot mipela planti manmeri i kamap sin manmeri. Na wankain olsem, wanpela man i bihainim olgeta tok bilong God, na long dispela rot God i mekim mipela planti manmeri i kamap "stretpela man". ²⁰ God i givim lo bilong mekim sin bilong manmeri i kamap bikpela moa yet. Tasol taim sin i kamap bikpela moa yet, orait grasia bilong God i kamap bikpela moa moa yet. ²¹ Sin i kamapim dai na sin i save stap i go i go. Na grasia bilong God bai i stap i go i go bikos God Em i givim stretpela pasin long manmeri. Na dispela stretpela pasin i kamapim laip i stap oltaim oltaim. Na ol dispela i kamap long wok bilong Jisas Kraiss BIKPELA bilong yumi.

Givim baksait long sin na bihainim Kraiss.

6 ¹ Orait, bai yumi tok wanem? Bai yumi mekim sin i go i go bilong God i ken i mekim grasia long yumi i go i go, a? ² Nogat tru! Yumi dai pinis long sin, na olsem wanem bai yumi i stap moa insait long sin pasin? ³⁻⁴ Ating yupela no klia tumas. Yumi bin kisim baptaiss long nem bilong Kraiss Jisas na dispela em i mak olsem yumi pas olgeta long Em. Em olsem na taim Em i dai, i olsem yumi i dai wantaim Em. Na taim ol i planim Em long matmat, i olsem ol i planim yumi long matmat wantaim Em.

Long strong bilong God, Krais i kirap long matmat na Em i stap laip, na i olsem yumi kirap long matmat wantaim Em bilong yumi tu i ken i wokabout long nupela laip.

⁵ Orait, yumi mas klia long dispela samting. Sapos yumi pas olsem long dai bilong Jisas, orait bai yumi pas olsem long kirap na laip bilong Em tu. ⁶ Yumi save, olupela laip bilong yumi em i dai wantaim Krais Jisas, na long dispela wei olupela laip bilong sin em i pinis. Em olsem na yumi no ken i stap moa aninit long sin. ⁷ Long wanem, manmeri i dai pinis ol i fri na sin i no bosim ol moa. ⁸ Olsem na, sapos yumi bin i dai wantaim Krais, orait yumi bilip olsem yumi bai i stap laip wantaim Em. ⁹ Yumi save, Krais i kirap bek pinis long dai na Em i no inap dai gen. Dai i no inap bosim Em gen. ¹⁰ Long wanem, taim Krais Em i dai Em i winim na pinisim strong bilong sin, na dispela samting i pinis olgeta. Nau Krais Em i stap laip na Em i pas wantaim God. ¹¹ Na wankain olsem, yupela mas tingim olsem yupela i dai pinis na sin em i pinis olgeta long yupela. Na tu, yupela mas tingim olsem nau yupela i stap laip na yupela i pas wantaim God taim yupela i pas long Krais Jisas.

¹² Na long dispela as yupela no ken i larim sin i stap long laip bilong yupela. Nogut sin i bosim yupela, na yupela bihainim ol tingting nogut i kamap long bel bilong yupela. ¹³ Yupela no ken i yusim wanpela hap bodi bilong yupela bilong mekim pasin nogut. Nogat. Yupela mas yusim olgeta samting bilong yupela bilong bihainim God. Yupela mas tingim olsem yupela manmeri i dai pinis na yupela kirap na kisim laip pinis. Olsem na yupela mas givim olgeta hap bodi bilong yupela long God, na yusim olgeta hap bodi bilong yupela bilong mekim stretpela pasin. ¹⁴ Sin i no ken i stap bosman bilong yupela. Long wanem, nau yupela no aninit long lo. Nogat. Nau yupela aninit long grasia bilong God.

Wokboi nating bilong mekim stretpela pasin.

¹⁵ Yu gat wanem tingting, yumi ken i mekim sin bikos yumi no aninit long lo nau na yumi i stap aninit long grasia bilong God, a? Nogat tru! ¹⁶ Ating yupela no klia. Taim yupela i givim yupela yet long wanpela man na yupela i bihainim dispela man, em nau, yupela wokboi nating bilong em. Olsem na, sapos yupela i bihainim sin, orait yupela wokboi nating bilong sin, na dispela em i rot bilong i dai. Na sapos yupela i bihainim tok bilong God, orait yupela wokboi nating bilong God, na dispela em i rot bilong stretpela pasin. ¹⁷ Tasol mi givim tenkyu long God. Long wanem, bipo, yupela i stap wokboi nating bilong sin, tasol nau yupela i gat bikpela laik long bihainim olgeta tok God i bin givim yupela. ¹⁸ Nau yupela i fri na yupela no aninit long sin moa. Na yupela i kamap pinis wokboi nating bilong stretpela pasin. ¹⁹ Mi yusim tok piksa bilong wokboi nating bikos yupela save long dispela samting. Bipo yupela i bin givim olgeta hap bodi bilong yupela olsem wokboi nating bilong mekim pasin i paul olgeta na bilong mekim kain kain pasin nogut. Tasol nau yupela mas givim olgeta hap bodi bilong yupela olsem wokboi nating bilong mekim stretpela pasin. Na dispela bai kamapim pasin i holi.

²⁰ Taim yupela i stap wokboi nating bilong sin, stretpela pasin i no bosim yupela. ²¹ Nau yupela sem long dispela pasin. Na taim yupela i stap wokboi nating bilong sin dispela kain pasin i kamapim gutpela samting, a? Nogat. Ol dispela kain pasin em i kamapim dai. ²² Tasol nau yupela i fri na yupela no aninit long sin moa na yupela kamap pinis wokboi nating bilong God. Na dispela bai kisim laip bilong yupela i kam insait long pasin i holi. Na bihain yupela bai lukim laip i stap oltaim oltaim. ²³ Long wanem, pe bilong sin em i dai. Tasol presen bilong God em i laip

i stap oltaim oltaim. Na dispela laip em i kamap long wok bilong Krai Jisas, BIKPELA bilong yumi.

Lo i pinis long yumi i pas long Krai.

7 ¹ Ol brata, yupela save pinis long lo. Olsem na, yupela save pinis olsem lo i ken i bosim ol manmeri taim ol i stap laip tasol. ² Mi tok piksa na yupela harim. Lo bilong marit i save pasim meri long man bilong em i go i go olgeta. Tasol taim man bilong em i dai pinis, orait lo bilong marit i no pasim meri moa long dispela man. ³ Em olsem na sapos meri i lusim man bilong em na em i go marit long narapela man, orait lo i ken i tok olsem meri i mekim pamuk pasin. Tasol sapos man bilong em i dai pinis na em i go marit long narapela man, orait lo i no gat toktok na meri em i no pamuk meri. Long wanem, taim man bilong em i dai pinis marit i pinis na meri em i fri long maritim narapela man.

⁴ Ol brata, taim yupela i bin i dai wantaim Krai marit bilong yupela long lo em i pinis olgeta, bilong yupela ken i pas long narapela man na bai yupela i karim kaikai God i save laikim. Mi tok long dispela man i bin kirap long matmat na Em i no inap dai moa. ⁵ Taim olupela bel i bosim yumi ol kain kain tingting nogut i wok insait long yumi. Na lo i bin sikrapim dispela. Em olsem na yumi karim kaikai nogut bilong i dai tasol. ⁶ Tasol nau yumi dai pinis na samting i laik pasim yumi em i no inap pasim yumi moa. Em olsem na yumi fri long lo. Long dispela as yumi no inap tanim pes moa long olupela wei bilong lo. Nogat. Nau yumi bihainim nupela wei bilong Spirit.

Sin i resis long yumi.

⁷ Orait, bai yumi tok wanem? Lo em i samting nogut, a? Nogat tru! Pastaim mi no save wanem samting i sin, tasol lo i soim mi wanem samting i sin. Em olsem na lo i tok, "*Yu no ken i*

mangalim ol samting bilong narapela manmeri." (Kisim Bek 20:17, Lo

^{5:21}) Orait, nau mi klia olsem dispela sin pasin i stap pinis long laip bilong mi. ⁸ Tasol sin i yusim dispela lo bilong kirapim ol kain kain mangal pasin long tingting bilong mi. Sapos lo i no stap, orait sin i save hait. ⁹ Pastaim mi no save long lo na mi stap gutpela. Tasol taim lo i kam long mi sin i kirap long laip bilong mi na mi klia olsem mi lus. ¹⁰ Lo em i samting bilong kamapim laip, tasol em i no kamapim laip long mi. Nogat. Em i kamapim dai long mi. ¹¹ Long wanem, sin i yusim dispela lo bilong giamanim mi, na long rot bilong lo sin i kilim mi i dai. ¹² Em olsem na lo yet em i holi, na olgeta tok i stap insait long lo em i holi na stretpela na gutpela.

¹³ Orait, dispela gutpela samting em i bin kamapim dai long mi, a? Nogat tru. Sin i yusim dispela gutpela samting na kamapim dai long mi. Em olsem na long dispela pasin mi ken i save long pasin bilong sin. Na long rot bilong lo sin i kamap ples klia pinis na yumi ken i save olsem sin em i bikpela samting nogut tru. ¹⁴ Yumi save pinis lo em i holi. Tasol mi no holi na sin i save holim mi. ¹⁵ Mi paul long pasin bilong mi. Pasin mi laik mekim mi no save mekim. Tasol pasin mi hetim mi save mekim. ¹⁶ Lo em i gutpela na mi wanbel long dispela. Na long dispela as mi no laikim dispela pasin mi save mekim. ¹⁷ Olsem na, taim mi mekim sin, i no mi yet i mekim. Nogat. Em i sin i stap insait long mi i mekim. ¹⁸ Mi klia olsem wanpela gutpela samting em i no stap insait long mi, mi minim dispela olupela bel bilong mi. Em olsem na mi laik mekim gutpela pasin, tasol mi no gat strong long mekim. ¹⁹ Na ol pasin mi save mekim em i no ol dispela gutpela pasin mi laik mekim. Nogat. Na ol pasin nogut mi no laik mekim em dispela pasin mi save mekim. ²⁰ Na sapos mi mekim pasin mi no laik mekim, orait i no mi i mekim. Nogat. Em i sin i save stap insait long mi i mekim.

²¹ Orait, mi lukim dispela samting i stap. Taim mi laik mekim gutpela pasin, pasin nogut i stap wantaim mi tu. ²² Olsem na, mi yet insait long tingting bilong mi, mi save amamas long lo bilong God. ²³ Tasol mi lukim narapela lo i mekim wok insait long mi. Em i lo bilong sin. Na dispela lo i save kirap na pait wantaim lo bilong God i stap long tingting bilong mi. Em olsem na sin i stap insait long mi i save holim mi. ²⁴ Tru tumas, mi man nogut tru! Husat bai helpim mi bilong lusim dispela bodi bilong i dai? ²⁵ Givim tenkyu long God! Long rot bilong Jisas Krais, BIKPELA bilong yumi, Em bai helpim. Em olsem na mi yet long tingting bilong mi, mi aninit long lo bilong God. Tasol, insait long olupela bel bilong mi, mi aninit long lo bilong sin.

Holi Spirit i stiaim nupela laip.

8 ¹ Olsem na, nau God i no save daunim manmeri i pas long Krais Jisas. ² Long wanem, Krais Jisas i bin mekim wok, na long dispela rot lo bilong Spirit bilong laip i mekim yumi fri long lo bilong sin na dai. ³ Yumi no gat strong long bihainim lo, na long dispela as lo i no kamapim laip long yumi. Tasol samting lo i no inap mekim God yet i mekim. God i salim PIKININI bilong Em yet i kam. Em i kamap man olsem yumi manmeri i mekim sin, na Em i kam bilong mekim wok long sin. Em olsem na long bodi bilong PIKININI bilong Em, God i daunim sin. ⁴ God i mekim olsem bai olgeta stretpela pasin bilong lo bai kamap long laip bilong yumi i no laik bihainim pasin bilong olupela bel na i laik bihainim laik bilong Holi Sprit. ⁵ Manmeri i wokabaut long laik bilong olupela bel ol i gat strongpela tingting long bihainim laik bilong olupela bel. Tasol manmeri i wokabaut long laik bilong Holi Spirit ol i gat strongpela tingting long bihainim laik bilong Holi Spirit. ⁶ Tingting bilong sin manmeri em i tingting bilong i dai. Tasol tingting bilong manmeri Holi Spirit i bosim em i tingting bilong laip na bel

isi. ⁷ Tingting bilong sin manmeri em i pait long God. Long wanem, em i no laik i stap aninit long lo bilong God, na tu, em i no inap i stap aninit long lo bilong God. ⁸ Ol manmeri we olupela bel i save bosim ol, ol i no inap tru long mekim pasin God i save laikim.

⁹ Tasol olupela bel i no save bosim yupela. Nogat. Holi Spirit i save bosim yupela, sapos Spirit bilong God i stap long yupela. Na manmeri i no gat Spirit bilong Krai i stap long em, orait em i no bilong Krai. ¹⁰ Tasol Krai i stap insait long yupela. Sin i bin wok insait long yupela na long dispela as bodi bilong yupela bai i dai. Tasol God i mekim wok pinis bilong kolim yupela "stretpela man", na long dispela as Holi Spirit i kamapim laip long yupela. ¹¹ God i bin kirapim Jisas long dai, na Spirit bilong dispela God i stap insait long yupela. Em olsem na dispela God i bin kirapim Jisas, Em bai givim laip long bodi bilong dai bilong yupela. Em bai mekim olsem long strong bilong Spirit bilong Em i stap pinis insait long yupela.

Ol samting Jisas i kisim yumi bai kisim.

¹² Ol brata, nau dispela tok mi mekim em i mas holim yumi. Yumi no ken i wokabout long laik bilong olupela bel. Nogat. ¹³ Sapos yupela wokabout long laik bilong olupela bel yupela bai dai. Tasol sapos long strong bilong Holi Spirit yupela i wok long mekim sin pasin i dai long bodi bilong yupela, orait yupela bai i stap laip. ¹⁴ Long wanem, manmeri i save bihainim stia bilong Spirit bilong God em i pikinini bilong God. ¹⁵ Olsem na, Holi Spirit Em i no kam long yupela bilong mekim yupela pret gen. Nogat. Holi Spirit Em i Spirit bilong mekim manmeri i kamap pikinini bilong God. Na Em yet i mekim yumi singaut, "Aba! Papa!" ¹⁶ Holi Spirit Em i pas wantaim yumi yet na dispela i save soim yumi olsem yumi pikinini bilong God. ¹⁷ Na sapos yumi pikinini

bilang God, orait ol samting God i laik givim Krai yumi tu bai kisim. Em olsem tasol yumi mas kisim hevi wantaim Krai pastaim, na bihain yumi bai sindaun wantaim Em long glori bilong Em.

Glori bilong bihain.

¹⁸ Taim mi tingting long glori God bai soim yumi long bihain, mi save tingim olsem ol hevi nau yumi save pilim em i liklik samting tumas. ¹⁹ God i bin wokim ol samting antap na Em i wokim dispela graun, na ol dispela samting i strong long wetim taim we ol pikinini bilong God i kamap ples klia. ²⁰⁻²¹ Ol samting antap na ol samting bilong dispela graun ol tu i save pilim hevi bilong sin. Ol i no mekim wanpela rong na kisim dispela hevi. Nogat. God i putim ol dispela samting insait long hevi bilong sin. Tasol ol dispela samting i no inap i stap olsem i go i go. Nogat. Bihain, ol dispela samting bai fri long hevi bilong sin na dai, na ol bai kam insait long glori bilong God wantaim ol pikinini bilong God. ²² Yumi save ol samting bilong antap na ol samting bilong dispela graun i pilim hevi kain olsem meri i pilim hevi taim em i laik karim pikinini. Na ol i pilim dispela hevi i kam i kam long nau. ²³ Em i no dispela samting tasol i pilim hevi i go i go. Nogat. Yumi we Holi Spirit i karim sampela kaikai pinis long laip bilong yumi, yumi tu i pilim olsem. Em olsem na yumi save pilim hevi bilong sin na yumi strong long wetim taim we God bai kamapim nupela bodi bilong yumi. Na taim bodi bilong yumi i kamap nupela, em nau yumi kamap pikinini bilong God olgeta. ²⁴ Taim God i kisim bek yumi, yumi bin tingting strong long dispela samting God i laik mekim long bihain. Yumi no kisim yet, olsem na yumi tingting strong long ol dispela samting. ²⁵ Tasol sapos yumi no kisim yet, orait yumi mas bel isi i stap na wetim ol dispela samting yumi tingting strong long kisim.

²⁶ Na tu, Holi Spirit i save helpim yumi. Yumi no gat strong, tasol Em i save helpim. Taim yumi laik prea yumi bai askim God long wanem samting? Yumi no save gut. Tasol Holi Spirit i pilim tru ol hevi bilong yumi, na dispela i dip tumas na i winim toktok, na Em i save karim hevi bilong yumi i go long God. ²⁷ God Em i klia long olgeta tingting bilong yumi na Em i klia long tingting bilong Holi Spirit. Olgeta taim Holi Spirit i save bihainim laik bilong God. Olsem na, taim Em i wok long askim God long helpim yumi, orait olgeta askim bilong Em i pas tru long laik bilong God. ²⁸ Na yumi save pinis, God i save bosim olgeta samting bilong mekim gut long ol manmeri i lavim Em, em ol manmeri God i singautim long laik na plen bilong Em. ²⁹ Bipo tru God i save tru long lain bilong Em, na Em i bin makim ol bilong mekim ol i kamap wankain olsem PIKININI bilong Em na bai dispela PIKININI i stap fesbon bilong planti brata. ³⁰ Na ol lain God i bin makim, Em i singautim ol. Na ol lain God i singautim, Em i givim stretpela pasin long ol na kolim ol "stretpela man". Na ol lain God i kolim "stretpela man", Em i kisim ol i kam insait long glori bilong Em.

Lavim bilong God i no inap pinis.

³¹ Orait, nau yumi bai tok wanem? Sapos God i mekim wok bilong helpim yumi, orait husat inap winim yumi? ³² God i no holim bek dispela wanpela PIKININI bilong Em. Nogat. Em i givim Em bilong helpim yumi olgeta. Olsem na, yumi ken i save, God Em i God bilong mekim grasia na Em bai givim ol narapela samting wantaim long yumi. ³³ Husat inap kotim ol manmeri God i bin makim? I no gat wanpela man inap mekim. Nogat. Em i God yet i bin givim stretpela pasin long ol na kolim ol "stretpela man". ³⁴ Husat inap daunim ol lain bilong God? I no gat wanpela man inap mekim. Krai Jisas i bin i dai, na tu, Em i kirap gen na

kisim laip. Em i stap pinis long han sut bilong God, na Em i save wok long askim God long helpim yumi. ³⁵ Husat inap rausim yumi long lavim bilong Krai? Ol kain trabel nabaut i ken i kamap, na ol kain hevi i ken i kamap, na ol kain bagarap i ken i kamap, tasol ol dispela kain samting i no inap tru long rausim yumi long lavim bilong Krai. Nogat. Na kaikai i ken i sot na klos i ken i sot, na samting nogut i ken i kamap, na pait i ken i kamap, tasol ol dispela kain kain samting i no inap tru long rausim yumi long lavim bilong Krai long yumi. ³⁶ Dispela kain tok i stap pinis long Buk bilong God, na i tok,

*"Bilong Yu yet mipela i save kisim bagarap olgeta taim.
Ol i lukim mipela i olsem sipsip
bilong kilim i dai tasol."* (Buk Song 44:22)

³⁷ Maski wanem kain samting i kamap long yumi Krai i save lavim yumi tru na long dispela as yumi bai winim olgeta kain kain trabel. ³⁸ Mi klia pinis long dispela. Wanpela samting i no inap tru long rausim yumi long lavim bilong Krai. Dai na laip i no inap. Ol ensel na ol spirit nogut i no inap. Ol samting bilong nau na ol samting bilong bihain i no inap. Na bikpela strong bilong wanpela samting i no inap. ³⁹ Ol samting bilong antap na ol samting bilong daunbilo i no inap. God i save lavim yumi tru na Em i soim yumi lavim bilong Em long wok bilong Krai Jisas BIKPELA bilong yumi. Olsem na, i no gat wanpela samting God i bin wokim inap tru long rausim yumi long dispela bikpela lavim bilong God.

God i makim ol lain manmeri bilong Em long laik na save bilong Em yet.

9 ¹ Mi pas long Krai, olsem na mi mekim trupela tok long yupela. Tru, long bel bilong mi, mi no giamanim yupela.

Holi Spirit i ken i witnisim bel bilong mi. ² Na tok bilong mi i olsem, mi gat bikpela sori na hevi i stap long bel bilong mi.

³ Long wanem, mi gat bikpela laik long ol brata bilong mi, em ol wanblut bilong mi, ol i kam pas long Krai. Em olsem na mi tingim olsem, sapos Krai inap long rausim na bagarapim mi bilong kisim ol, orait bai mi wanbel long dispela. ⁴ Ol wanblut bilong mi ol i bilong Israel, em ol lain God i bin adoptim. Na glori bilong God, na ol kontrak, na lo God i bin givim, na lotu, na ol promis, ol dispela samting i bilong ol. ⁵ Na ol tumbuna papa i bilong ol. Na long dispela lain yet, long sait bilong bodi, Krai i bin kamap. Na Krai Em i God bilong olgeta samting, na olgeta blesim em bilong Em oltaim oltaim. Tru tumas.

⁶ Tasol yumi no ken i tingim tok bilong God i pundaun nating. Nogat. Long wanem, em i no olgeta manmeri i bon insait long lain Israel ol i Israel trutru. ⁷ Na em i no olgeta manmeri i kamap long lain bilong Abraham ol i pikinini trutru bilong Abraham. Nogat. Bipo, God i tokim Abraham olsem, "*Aisak tasol em i pikinini trutru bilong yu.*" (Jenesis 21:12) ⁸ Dispela tok i minim olsem, em i no ol pikinini Abraham i karim ol i pikinini bilong God. Nogat. Ol pikinini i kamap long rot bilong promis God i givim Abraham ol i pikinini bilong God. ⁹ Promis God i mekim i olsem, "*Klostu long dispela taim neks yia bai Mi kam bek na Sara bai karim wanpela pikinini man.*" (Jenesis 18:10, 14) ¹⁰ Na i gat sampela tok moa long stori bilong Rebeka. Tupela pikinini bilong Rebeka i gat wanpela papa tasol, em tumbuna Aisak. ¹¹ God i laik pasin bilong Em bilong makim na kisim bek ol wan wan manmeri em mas i go yet. Em i no makim ol bikos ol i mekim gutpela pasin. Nogat. Em i makim ol long laik na save bilong Em yet. Em olsem na, taim tupela pikinini bilong Rebeka i no bon yet, na tupela i no bin mekim wanpela gutpela o nogut samting yet, ¹² God i tokim Rebeka olsem, "*Fes bon bai i stap aninit long sekon bon.*" (Jenesis

25:23) ¹³ Buk bilong God i tok, "*Jekop Mi lavim, tasol Iso Mi hetim.*" (Malakai 1:2-3)

¹⁴ Orait, bai yumi tok wanem? God i no mekim fea, a? Nogat tru! ¹⁵ Long wanem, God i tokim Moses olsem, "*Mi ken i marimari long husat manmeri Mi laik marimari long em. Na Mi ken i sori long husat manmeri Mi laik sori long em.*" (Kisim Bek 33:19)

¹⁶ Olsem na, i klia olgeta, pasin we God i makim na kisim bek wan wan manmeri em i no samting bilong laik na strong bilong manmeri. Nogat. Em i samting bilong God yet na marimari bilong Em. ¹⁷ Long Buk bilong God, God i tokim Fero olsem, "*I gat as long Mi mekim yu kamap king; Mi laik yusim yu bilong soim pawa bilong Mi. Mi mekim olsem bai ol manmeri long dispela graun i ken i harim nem bilong Mi.*" (Kisim Bek 9:16) ¹⁸ Olsem na, God i marimari long husat man Em i laik marimari long em, na Em i pasim bel bilong husat man Em i laik pasim bel bilong em.

¹⁹ Long dispela toktok ating sampela bilong yupela bai askim mi olsem, "Orait, long wanem as God i kotim mipela? Husat inap tru long abrusim laik bilong God?" ²⁰ Tasol, yu man, na yu husat na yu sutim tok long God? Samting wanpela man i bin wokim i ken i kirap na tokim man i bin wokim em olsem, "Long wanem as yu bin wokim mi olsem," a? ²¹ Na man i wokim sospen long graun, em i no gat rait bilong wokim wanem kain sospen em i laik wokim, a? Em i no gat rait long wokim tupela sospen long wanpela graun, wanpela bilong yusim long gutpela samting na wanpela bilong yusim long nogut samting, a?

²² Sapos God i laik soim bel hat bilong Em na Em i laik soim pawa bilong Em, na sapos Em i redim ol sampela manmeri bilong pilim bel hat na pawa bilong Em, em ol manmeri bilong kisim bagarap, na Em i strongim bel bilong Em bilong larim dispela kain manmeri i stap long ai bilong Em, em i orait Em i ken i mekim. ²³ God i

mekim olsem bilong ol narapela manmeri i ken i save moa long glori bilong Em. Ol dispela manmeri em ol manmeri God i mekim marimari long ol. God i bin redim ol long bipo bilong kisim glori bilong Em. ²⁴ Ol dispela manmeri em yumi; yumi God i bin singautim. Em i no singautim ol wan wan manmeri bilong Juda tasol. Nogat. Em i singautim ol wan wan manmeri bilong ol Jentail tu. ²⁵ God i bin tok pinis long Hosea:

*"Ol manmeri i no manmeri bilong Mi, bai mi kolim ol 'manmeri bilong Mi',
na lain manmeri Mi no bin lavim, bai Mi kolim ol 'lain manmeri Mi lavim'." (Hosea 2:23)*

²⁶ *"Na long ples ol i harim tok olsem, 'Yupela no manmeri bilong Mi,'
ol bai harim dispela tok, 'Yupela pikinini bilong trupela God.' "*
(Hosea 1:10)

²⁷ Na Aisaia i autim bikpela tok olsem, *"Ol lain Israel ol i planti tru olsem wesan bilong nambis i planti tru, tasol BIKPELA bai kisim bek liklik hap bilong ol tasol. ²⁸ Long wanem, BIKPELA i kotim na sentisim pinis manmeri bilong dispela graun, na kwiktaim tasol Em bai bihainim olgeta dispela tok bilong Em."*
(Aisaia 10:22-23) ²⁹ Bipo Aisaia i bin mekim dispela tok:

*"Sapos BIKPELA Bilong Olgeta Strong i no bin holim liklik lain bilong yumi i stap,
yumi inap bagarap pinis olsem ol lain manmeri bilong taun Sodom na Gomora." (Aisaia 1:9)*

Ol Israel ol i no bilip.

³⁰ Orait, bai yumi tok wanem? Yumi ken i tok olsem, ol Jentail manmeri ol i no tingting long mekim wok na kamap

stretpela manmeri, tasol ol i kamap stretpela manmeri pinis. Ol i kamap stretpela manmeri long rot bilong bilip. ³¹ Tasol ol Israel manmeri, ol i tingting long mekim wok na kamap stretpela manmeri na ol i bihainim ol lo bilong stretpela pasin, tasol ol i no kamap stretpela manmeri. ³² Na olsem wanem ol i no kamap stretpela manmeri? Ol i no kamap stretpela manmeri bikos ol i tingim wok bilong ol yet long bihainim lo bai mekim ol i kamap stretpela manmeri, na ol i no klia olsem, long rot bilong bilip tasol ol i ken i kamap stretpela manmeri. Ol i pundaun long "ston i sakim lek". ³³ Buk bilong God i tok olsem,

*"Lukim, Mi putim wanpela ston long Saion
na dispela ston bai sakim lek bilong ol sampela manmeri,
em wanpela ston i mekim ol i pundaun,
na husat manmeri i bilipim na trastim Em,
bai ol i no inap tru long kisim sem."* (Aisaia 8:14, 28:16)

10 ¹ Ol brata bilong mi, bikpela laik bilong mi na prea bilong mi i olsem, God i ken i kisim bek ol lain Israel.

² Mi ken i witnisim ol olsem, ol i gat bikpela laik long ol samting bilong God, tasol trupela save i no stiaim dispela laik bilong ol.

³ Long wanem, ol i no save long stretpela pasin God i save givim, na ol i wok long kamapim stretpela pasin bilong ol yet. Em olsem na ol i no putim ol yet aninit long stretpela pasin bilong God.

⁴ Kraus yet i fulfilim lo na kamapim stretpela pasin bilong givim ol manmeri i bilip.

Gutnius i bilong olgeta manmeri.

⁵ Moses i bin mekim sampela toktok long sait bilong lo na stretpela pasin. Em i tok, "*Man i bihainim ol dispela samting bai i stap laip long dispela samting.*" (Wok Pris 18:5) ⁶ Tasol, long stretpela pasin i kamap long rot bilong bilip i gat dispela tok i stap, "*Long*

bel bilong yu, yu no ken i tok olsem, 'Husat bai i go antap long heven?' " (Lo 30:12) Dispela tok i olsem yu laik i go kisim Krai i kam daun. ⁷ Na "*yu no ken i tok, 'Husat bai i go daun long ples bilong daiman?' "* (Lo 30:13) Dispela tok i olsem yu laik i go kisim Krai i kamap long matmat. ⁸ Buk bilong God i tok wanem long minim bilong ol dispela toktok? Em i tok, "*Tok bilong God i stap klostu long yu: em i stap long maus bilong yu na long bel bilong yu.*" (Lo 30:14) Dispela Tok bilong God i stap klostu long yu em i dispela tok mipela i save autim. ⁹ Em olsem na, sapos long maus bilong yu, yu tokaut olsem, Jisas Em i BIKPELA, na long bel bilong yu, yu bilip olsem, God i bin kirapim Jisas long matmat, orait bai yu kisim laip. ¹⁰ Long wanem, long bel bilong yu tasol bai yu bilip na God i givim stretpela pasin long yu na kolim yu "stretpela man", na long maus bilong yu tasol bai yu tokaut na konfemim bilip bilong yu. Long dispela bai yu kisim laip. ¹¹ Buk bilong God i tok olsem, "*Husat manmeri i bilipim na trastim Em, bai i no inap tru long kisim sem.*" (Aisaia 28:16) ¹² Ol lain Juda na ol lain Jentail i wankain tasol. Long wanem, wanpela BIKPELA tasol Em i BIKPELA bilong olgeta, na Em i save blesim olgeta manmeri i singaut long Em. ¹³ Long wanem, "*Olgeta manmeri i singaut long BIKPELA bai kisim laip.*" (Joel 2:32)

¹⁴ Tasol, hau na bai ol i singaut long BIKPELA sapos ol i no bilipim na trastim Em? Na hau na bai ol i bilipim na trastim Em sapos ol i no bin harim tok bilong Em? Na hau na bai ol i harim tok bilong Em sapos wanpela man i no bin autim tok long ol?

¹⁵ Na hau na bai wanpela man i autim tok long ol sapos BIKPELA i no bin salim em i go bilong autim tok long ol? Buk bilong God i mekim dispela tok, "*Lek bilong ol man i kam autim gutnius i naispela tru!*" (Aisaia 52:7) ¹⁶ Tasol i no olgeta manmeri bilong Israel i bihainim gutnius. Nogat. Aisaia i bin tok, "*BIKPELA, husat i bilipim na trastim dispela tok mipela i autim long ol?*" (Aisaia 53:1)

¹⁷ Olsem na, bilip i save kamap long rot bilong harim; bilip i save kamap long rot bilong harim tok bilong Krai.

¹⁸ Tasol, ating ol i no harim tok, a? Nogat. Ol i bin harim. Long wanem,

"Nek bilong ol i go long olgeta hap bilong dispela graun, toktok bilong ol i go long olgeta 4-kona bilong dispela wol."

(Buk Song 19:4)

¹⁹ Tasol ating ol Israel ol i no klia, a? Pastaim Moses i bin tok,

"Bai Mi mekim yupela jelas long ol manmeri i no lain manmeri olsem yupela, na long sampela lain manmeri i no gat gutpela save bai Mi mekim yupela i kisim belhat." (Lo 32:21)

²⁰ Na tu Aisaia i strong na em i mekim dispela tok,

"Ol manmeri i no bin wok long painim Mi, ol i kisim Mi pinis. Mi bin putim Mi yet long ples klia long ol manmeri i no singautim Mi." (Aisaia 65:1)

²¹ Tasol long ol lain Israel Aisaia i mekim dispela tok, *"Olgeta taim long olgeta de Mi putim han bilong mi i go bilong kisim ol, tasol ol i lain manmeri bilong sakim tok bilong Mi na bikhet long Mi."* (Aisaia 65:2)

God i kisim bek ol liklik lain bilong ol lain Israel.

11 ¹ Orait, ol dispela tok i minim olsem God i lusim olgeta ol lain bilong Em, a? Nogat tru. Long wanem, mi yet mi wanpela man bilong lain Israel na mi pikinini bilong Abraham na mi bilong lain bilong Benjamin. ² God i no givim baksait long lain manmeri bilong Em, em ol lain we bipo tru God Em i save tru long ol. Ating yupela no save long stori bilong Elaija i stap long Buk bilong God, a? Elaija i bin komplem long God long ol lain

Israel na em i tok, ³ *"BIKPELA, ol i bin kilim i dai ol profet bilong Yu, na ol i rausim ol alta bilong Yu, na mi wanpela tasol i stap na ol i laik kilim mi tu."* (1 King 19:10, 14) ⁴ Tasol God i mekim wanem tok bilong bekim tok bilong Elaija? God i tok, *"Mi bin holim i stap 7,000 manmeri bilong Mi yet na wanpela bilong ol i no brukim skru long Bal."* (1 King 19:18) ⁵ Na wankain olsem bilong nau. God i holim i stap hap lain manmeri bilong Em yet. God i bin mekim grasia long ol na makim ol. ⁶ Em olsem na sapos God i mekim grasia long ol na makim ol, orait i klia olsem God i no skelim pasin bilong ol na makim ol. Nogat. Sapos God i skelim pasin bilong ol na makim ol, orait grasia bilong God i no gat wok bilong em i stap.

⁷ Em olsem na samting ol Israel i laik kisim, ol i no kisim. Tasol ol manmeri God i bin makim, ol i bin kisim, na ol narapela manmeri God i pasim bel bilong ol. ⁸ Buk bilong God i tok olsem,

*"God i mekim ol i stap olsem man i slip i dai,
olsem na ai bilong ol i no save lukim,
na ia bilong ol i no save harim,
na ol i stap olsem yet."* (Lo 29:4, Aisaia 29:10)

⁹ Na Devit i bin mekim dispela tok,

*"Larim ol blesim bilong God i holim na banisim ol,
bai ol i pundaun na kisim pe nogut."*

¹⁰ *Larim ai bilong ol i stap tudak bai ol i no ken i lukluk,
na larim ol i karim hevi i go i go oltaim oltaim."* (Buk Song 69:22-23)

God i joinim ol Jentail manmeri.

¹¹ Orait, ol dispela tok i minim olsem taim ol Israel i pundaun ol i lus olgeta, a? Nogat tru! Ol i bin givim baksait long Krai na dispela pasin bilong ol i opim rot bilong ol Jentail i kisim laip long wok bilong Krai. God i laik ol Israel i mas lukim dispela

samting na tingting gut. ¹² Na sapos sin bilong Israel i bin kamapim gutpela samting tru bilong ol manmeri bilong dispela graun, na feil bilong Israel i bin kisim gutpela samting tru i kam long ol Jentail, orait taim God i kisim Israel i kam bek gen long Em gutpela samting moa moa yet i ken i kamap bilong ol lain manmeri bilong dispela graun.

¹³ Mi tok nau long yupela ol Jentail. Mi aposel bilong ol Jentail na mi save wok hat long dispela wok mi mekim namel long yupela. ¹⁴ Mi mekim olsem bai ol wanlain bilong mi i ken i lukim na tingting gut, na sampela i ken i tanim bel na kam long Kraus. ¹⁵ Tingim. God i lusim Israel na long dispela pasin Em i kisim ol narapela manmeri bilong dispela graun i kam. Em olsem na taim God i kisim bek ol Israel planti manmeri bai i lusim dai na kisim laip. ¹⁶ Sapos liklik hap bilong bret i holi, em ol man i givim olsem ofa, orait olgeta hap bilong bret em i holi. Sapos rop em i holi, orait ol han tu em i holi.

¹⁷ Sapos God i rausim sampela han, na Em i kisim yupela ol wail oliv na joinim yupela wantaim ol han i stap yet na yupela i serim gutpela gris i kam long rop bilong gutpela diwai oliv, ¹⁸ orait yupela no ken i hambak long ol han God i bin rausim. Tingim. I no yupela i givim gris long rop bilong diwai, nogat, em i rop i givim gris long yupela. ¹⁹ Yupela i tok olsem, "Ol sampela han i lus, bai mipela i ken i pas." ²⁰ Em tru. Tasol, ol i lus bikos ol i no bilip. Yupela i pas tasol bikos bilip i bin kam long yupela. Olsem na, yupela no ken i apim yupela yet. Nogat. Mobeta yupela kirap nogut. ²¹ Long wanem, sapos God i no larim i stap ol as han bilong diwai, orait Em i no inap larim yupela i stap. ²² Skelim gut. God Em i gutpela tru. Na God Em i hatpela tru. Em i mekim hatpela pasin tru long ol man i givim baksait long Em. Na Em i mekim gutpela pasin tru long yupela, tasol yupela i mas holim pas gutpela wei bilong God. Sapos nogat, orait God i ken i katim

na rausim yu tu. ²³ Na ol lain Israel, sapos ol i lusim pasin we ol i givim baksait long Kraiss, orait God i ken i joinim ol gen long diwai. Long wanem, God i gat pawa bilong joinim ol gen.

²⁴ Pastaim yupela i stap han bilong wail diwai oliv, tasol God i katim yupela na joinim yupela long gutpela diwai oliv. Em olsem na sapos God i joinim han bilong wail diwai oliv long gutpela diwai oliv, orait i no gat kwesten mak long God i joinim ol han bilong gutpela diwai oliv i go bek gen long diwai bilong ol yet.

Ol Israel bai kam insait long kingdom bilong God.

²⁵ Ol brata, nogut yupela i no gat save i tingim olsem yupela i gat bikpela save. Olsem na, bai mi putim ples klia samting i bin hait na yupela ken i save. Harim. Planti manmeri bilong ol Israel bel bilong ol i pas. Na bel bilong ol bai pas inap long ol planti manmeri bilong ol lain Jentail i kam pulap. ²⁶ Em olsem na long dispela wei God bai kisim bek ol Israel. Buk bilong God i tok olsem,

*"Man Bilong Sevim ol manmeri bai kirap long Saion,
na Em bai rausim sin bilong ol lain bilong Jekop.*

*²⁷ Dispela em i kontrak Mi mekim long ol,
taim Mi tekewe sin bilong ol."*

(Aisaia 59:20-21, Aisaia 27:9, Jeremaia 31:33-34)

²⁸ Nau ol Israel i stap birua bilong gutnius bilong God, bai gutnius i ken i kam long yupela. Tasol God i lavim ol Israel. Long wanem, Em i bin makim ol na Em i tingim yet ol tumbuna bilong ol. ²⁹ Harim. God i bin givim ol gutpela samting long ol na Em i bin singautim ol na dispela i no inap senis. ³⁰ Bipo yupela tu i bin givim baksait long God, tasol nau God i marimari long yupela. Ol Israel i bin givim baksait long God na long dispela as marimari bilong God i bin kam long yupela. ³¹ Em olsem na nau ol Israel i

givim baksait long God, tasol God i ken i marimari long ol. God i bin marimari long yupela na long dispela as marimari bilong God i ken i kam nau long ol Israel. ³² Long wanem, God i larim pasin bilong givim baksait long Em i kalabusim olgeta manmeri, bai Em i mekim marimari long olgeta.

³³ Tru tumas, save bilong God, na gutpela tingting bilong yusim save long gutpela we, i pulap tru long God! I no gat wanpela man inap tru long skelim ol disisen bilong Em, na i no gat wanpela man inap tru long skelim ol pasin bilong Em!

³⁴ *"Husat inap save long tingting bilong BIKPELA, na husat inap long givim stia tok long Em?"* (Aisaia 40:13)

³⁵ *"Husat inap long mekim sampela gutpela wok bilong BIKPELA, bai BIKPELA i ken i bekim bek long em?"* (Jop 41:11)

I no gat.

³⁶ Long wanem, olgeta samting i bin kam long han bilong Em, na olgeta samting i bin kamap long strong bilong Em, na olgeta samting i stap bilong litimapim nem bilong Em. Olgeta glori em bilong Em bilong oltaim oltaim. Tru tumas.

Yumi mas givim bodi bilong yumi long God.

12 ¹ Olsem na, ol brata, nau mi laik tokaut strong olsem, God Em i marimari na Em i mekim planti gutpela wok bilong sevim yupela, na long dispela as yupela mas givim bodi bilong yupela long God olsem wanpela ofa i gat laip. Olsem na, yupela mas mekim pasin i holi na mekim pasin God i laikim. Taim yupela mekim olsem yupela lotuim God. ² Yupela no ken i wokabaut moa wankain olsem ol manmeri bilong dispela graun. Nogat. Yupela mas kisim nupela tingting na senisim pasin bilong yupela. Na sapos yupela traime na bihainim laik bilong God, bai yupela wanbel olgeta long laik bilong God. Yupela bai klia olsem

pasin God i laikim em i gutpela samting na em i samting bilong kamapim amamas na em i samting i stret tru.

Tingting gut long wok bilong Krai.

³ God i mekim grasia long mi na Em i givim strong long mi bilong mekim wok, na long dispela strong mi laik mekim sampela toktok long yupela wan wan. Yu no ken i tingim yu yet i nambawan tru na yu winim mak bilong yu. Nogat. Yu mas tingting gut na tingim na skelim ol samting bilong bilip, em dispela bilip God i bin givim yupela wan wan. ⁴ Yumi gat wanpela bodi, tasol planti hap bodi i stap long dispela wanpela bodi. Na olgeta hap bilong bodi i no bilong mekim wanpela kain wok. Nogat. Ol i gat kain kain wok i stap. ⁵ Na wankain olsem yumi manmeri i pas long Krai, yumi planti i stap tasol yumi olsem wanpela bodi. Na wanpela hap bilong dispela bodi em bilong ol narapela hap bilong dispela bodi. ⁶ God i bin mekim grasia long yumi wan wan, na long dispela as Em i givim strong long yumi wan wan bilong mekim wan wan wok. Em olsem na yumi mas yusim dispela strong na mekim wok. Long sampela manmeri God i givim strong bilong mekim wok profet, orait em i mas yusim dispela strong inap long skel God i givim em. ⁷ Long sampela manmeri God i givim strong bilong helpim ol narapela manmeri long mekim sampela wok, orait em i mas helpim. Long sampela manmeri God i givim strong bilong skulim ol narapela, orait em i mas skulim ol. ⁸ Long sampela manmeri God i givim strong bilong strongim ol narapela, orait em i mas strongim ol. Long sampela manmeri God i givim strong bilong skelim na givim ol samting, orait em i mas skelim na givim. Long sampela manmeri God i givim strong bilong mekim wok lida, orait em i mas lidim stret na fea. Long sampela manmeri God i givim strong bilong

mekim wok bilong sori na mekim gutpela long narapela manmeri, orait em i mas amamas na mekim.

Mak bilong trupela manmeri bilong God.

⁹ Lavim bilong yupela mas i stap trupela samting. Yupela mas hetim ol samting i nogut na pas long ol samting i gutpela. ¹⁰ Yupela mas givim yupela yet bilong lukautim ol brata na susa bilong yupela. Lavim ol na lukautim ol. Rispektim ol na putim ol i go paslain long yu. ¹¹ Yupela no ken i les o slek long bihainim BIKPELA. Holim pas strongpela tingting bilong yupela bilong bihainim ol samting bilong BIKPELA. ¹² Yupela mas amamas na wetim ol samting God bai wokim long bihain. Taim trabel na hevi i kamap yupela mas strong na bel isi i stap. Na yupela mas strong i stap bilong mekim prea. ¹³ Helpim ol manmeri bilong God taim ol i nidim sampela helpim. Amamas na mekim gutpela wok bilong lukautim ol lain manmeri bilong God.

¹⁴ Yupela mas mekim gutpela pasin long ol manmeri i wok long bagarapim yupela. Yupela no ken i mekim nogut long ol. Nogat. Yupela mas blesim ol. ¹⁵ Na sapos sampela manmeri i gat amamas, orait yupela amamas tu. Na sapos sampela manmeri i gat hevi na ol i sori na krai, orait yupela sori na krai tu. ¹⁶ Yupela mas wanbel na bel isi i stap wantaim ol narapela manmeri. Yupela no ken i apim yupela yet long tingting bilong yupela. Nogat. Yupela mas daunim dispela kain tingting na pren wantaim ol manmeri nating. Yupela no ken i tingim olsem yupela winim ol narapela manmeri. ¹⁷ Na sapos sampela manmeri i mekim pasin nogut long yupela, orait yupela no ken i bekim bek na mekim pasin nogut long ol. Nogat. Yupela mas lukaut gut long ol pasin yupela i mekim, na yupela i mekim gutpela pasin ol manmeri i tingim i gutpela pasin. ¹⁸ Sampela taim ol sampela manmeri i no inap sindaun isi wantaim yupela, tasol yupela mas

wok hat bilong sindaun isi wantaim olgeta manmeri. ¹⁹ Ol gutpela pren bilong mi, yupela no ken i tingting long bekim bek long ol manmeri i mekim rong long yupela. Nogat. Yupela mas larim na God bai mekim bel hat long ol. Dispela kain tok i stap pinis long Buk bilong God. BIKPELA i bin tok olsem, "*Pasin bilong bekim rong em i wok i stap long han bilong Mi. Mi bai bekim bek.*" (Lo 32:35)

²⁰ Pasin yupela i mas mekim i olsem Buk bilong God i tok, "*Sapos birua bilong yu em i hangre, orait givim kaikai long em. Na sapos em i drai long wara, orait givim wara long em. Na taim yu mekim olsem, em olsem yu hipim hatpela sit bilong paia long het bilong em.*" (Provep 25:21-22) ²¹ Yupela no ken larim pasin nogut i winim yupela. Nogat. Yupela mas mekim gutpela pasin bilong winim pasin nogut.

Manmeri bilong God i mas aninit long gavman bilong ol.

13 ¹ Olgeta manmeri mas i stap aninit long gavman bilong ol. Long wanem, wanpela gavman i no kamap nating. Nogat. Olgeta gavman i stap God yet i bin kamapim na putim. ² Olsem na, husat manmeri i givim baksait long gavman, ol i givim baksait long samting God i bin kamapim. Na manmeri i givim baksait long samting God i bin kamapim, ol bai kisim pe nogut i kam bilong ol yet. ³ Harim. Ol gavman ol i no inap pretim ol manmeri i save mekim pasin i stret. Nogat. Ol bai pretim ol manmeri i mekim pasin nogut. Sapos yu no laik gavman i mekim save long yu, orait yu mekim pasin i stret na ol bai amamas na wanbel long yu. ⁴ Long wanem, gavman i olsem wokman bilong God bilong mekim gutpela long yu. Tasol, sapos yu mekim rong, orait yu ken i pret. Long wanem, gavman em i no samting nating. Nogat. Gavman i olsem wokman bilong God, na long han bilong gavman God bai bel hat na mekim save long manmeri i mekim rong. ⁵ Olsem na, sapos yupela i laik abrusim

stik bilong gavman, orait yupela i stap aninit long gavman. Tasol, mobeta yupela i stap aninit long gavman bikos em i rait pasin bilong ol manmeri bilong God. ⁶ Na long dispela as tu yupela i save baim takis mani long ol gavman. Long wanem, ol gavman i olsem wokman bilong God na ol i lusim ol narapela wok bilong mekim dispela wok bilong gavman. ⁷ Olsem na, samting ol gavman i tok yupela i mas givim ol, orait yupela i mas givim. Sapos ol i tok yupela mas baim takis mani, orait baim tasol. Na sapos ol i tok yupela mas givim sampela mani long ofisa bilong gavman, orait givim tasol. Na sapos ol i tok yupela mas rispektim ol gavman, orait rispektim ol. Na sapos ol i tok yupela mas givim biknem long sampela manmeri bilong gavman, orait givim biknem long ol.

Pasin bilong lavim i nambawan.

⁸ Yupela mas baim dinau bilong yupela, na nambawan dinau yupela mas wok long baim em i dinau bilong lavim ol narapela manmeri. Long wanem, manmeri i save lavim ol narapela manmeri ol i bihainim tru lo bilong God. ⁹ Sampela lo bilong God i olsem, "*Yu no ken i mekim pamuk pasin.*" "*Yu no ken i kilim manmeri i dai.*" "*Yu no ken i stil.*" "*Yu no ken i mangalim samting bilong narapela manmeri.*" (Kisim Bek 20:13-15, Lo 5:17-19, ²¹) As bilong ol dispela lo wantaim ol narapela lo i stap i olsem, "*Lavim ol manmeri wankain olsem yu save lavim yu yet.*" (Wok Pris 19:18) ¹⁰ Manmeri i save lavim narapela manmeri em i no inap mekim pasin nogut long em. Olsem na, pasin bilong lavim manmeri em i wankain pasin bilong bihainim tru olgeta lo bilong God.

¹¹ Yupela mas skelim gut dispela taim nau yumi stap long em na yupela lavim ol manmeri olsem mi tok. Nau i no taim bilong yupela slip i stap. Nogat. Nau em i taim bilong wekap na

mekim wok. Long wanem, bipo, taim yumi bilip, yumi bin tingim olsem taim bilong God i kisim yumi i klostu. Tasol nau, taim bilong God i kisim yumi i klostu moa yet. ¹² Nait i laik pinis na klostu tulait i kamap. Em olsem na yumi lusim ol pasin bilong tudak na yumi karamapim yumi yet long ol pasin bilong tulait. ¹³ Yumi lain bilong tulait, olsem na yumi mas wokabout long tulait na mekim ol pasin i stretpela. Yumi no ken i mekim pasin disko na spak nabaut. Yumi no ken i mekim pasin pamuk na pilai nabaut wantaim ol man o meri. Yumi no ken i mekim pasin bilong kros pait na pasin bilong jelas. ¹⁴ Nogat. Lusim ol dispela pasin, na yupela karamapim yupela yet long ol pasin bilong BIKPELA Jisas Krai. Em olsem na yupela no ken i tingting moa long ol laik bilong olupela bel.

Yumi mas rispektim ol brata.

14 ¹ Sampela brata i stap na ol i no strong long tingting bilong ol. Yupela mas welkamim ol long sios, tasol yupela no ken i tok pait wantaim ol long ol liklik samting yupela no wanbel long en. ² Sampela manmeri i klia olsem i orait long kaikaim olgeta kain kaikai. Tasol tingting bilong sampela manmeri i no strong, olsem na ol i kaikaim kaikai bilong gaden tasol. ³ Manmeri i save kaikaim olgeta kain kaikai em i no ken i tingting nogut long ol narapela manmeri i save kaikaim kaikai bilong gaden tasol. Na tu, manmeri i save kaikaim kaikai bilong gaden tasol, em i no ken i daunim ol narapela manmeri i save kaikaim olgeta kain kaikai. Long wanem, God Em i orait long ol dispela manmeri. ⁴ Yu husat na yu skelim pasin bilong wokboi bilong narapela man? Em i sanap gutpela o em i pundaun, dispela em i samting bilong bos bilong em. Tasol em bai sanap gutpela. Long wanem, BIKPELA bai mekim em i sanap gutpela.

⁵ Sampela manmeri i tingim olsem wanpela de em i holi na i winim ol narapela de bilong wik. Na narapela manmeri i tingim olsem olgeta de i wankain tasol. Em i orait, tasol yu yet yu mas klia long tingting bilong yu. ⁶ Na manmeri i tingim olsem wanpela de em i spesol, em i orait. Long wanem, em i mekim olsem bilong litimapim nem bilong BIKPELA. Na manmeri i kaikaim mit, em i orait. Long wanem, em i save tok tenkyu long God na long dispela pasin em i litimapim nem bilong BIKPELA na em i kaikai. Na manmeri i tambu long kaikaim mit, em i orait tu. Long wanem, em tu i litimapim nem bilong BIKPELA taim em i tok tenkyu long God na em i kaikai. ⁷ Long wanem, nau yumi no tingim laip bilong yumi em i samting bilong yumi yet, na yumi no tingim dai bilong yumi em i samting bilong yumi yet. Nogat. ⁸ Sapos yumi i stap laip, orait laip bilong yumi em bilong BIKPELA. Na sapos yumi i dai, orait dai bilong yumi em bilong BIKPELA. Olsem na, maski yumi stap laip o yumi dai, yumi bilong BIKPELA tasol. ⁹ Bilong dispela as stret Jisas Em i dai na Em i kirap gen, bilong Em i ken i stap BIKPELA bilong manmeri i dai na bilong manmeri i stap laip.

¹⁰ Long wanem as yu save skelim brata bilong yu? Long wanem as yu tingting nogut long brata bilong yu? Yu save, yumi olgeta bai sanap long kot bilong God na Em bai skelim yumi olgeta. ¹¹ Buk bilong God i gat tok olsem,

*"BIKPELA i tok, Tru tumas Mi stap
na olgeta manmeri bai brukim skru long Mi
na olgeta bai tokaut klia long God long pasin ol i bin mekim."*

(Aisaia 45:23)

¹² Olsem na, yumi olgeta wan wan bai sanap long ai bilong God na tokaut klia long as bilong olgeta pasin yumi bin mekim.

Pasin yumi mekim i no ken i pundaunim brata bilong yumi.

¹³ Long dispela as yumi ken i lusim pasin bilong daunim brata bilong yumi. Na yumi ken i wokim disisen bilong yumi bilong lusim olgeta samting i save mekim brata bilong yumi i pundaun long sin. ¹⁴ Mi pas pinis long BIKPELA Jisas. Olsem na, mi bin skelim na mi klia pinis olsem, wanpela kaikai yet em i no doti. Nogat. Tasol, sapos wanpela manmeri i pilim olsem wanpela kaikai i doti, orait bilong dispela manmeri tasol dispela kaikai i doti. ¹⁵ Sapos kaikai yu kaikaim i mekim brata bilong yu i pundaun long sin, orait yu no mekim pasin bilong lavim em. Nogat. Jisas i bin dai long dispela brata na yu no ken i larim dispela kaikai bilong yu i bagarapim em. ¹⁶ Olsem na, yumi no ken i larim ol samting yumi tingim i gutpela samting i kamap nogut samting long ai bilong ol man. ¹⁷ Long wanem, kingdom bilong God em i no samting bilong kaikai na dring. Nogat. Em i samting bilong stretpela pasin, na samting bilong pasin bel isi, na samting bilong amamas Holi Spirit i save kamapim. ¹⁸ Manmeri i bihainim Kraus long dispela gutpela wei God i amamas long ol, na ol manmeri nabaut bai rispektim ol. ¹⁹ Em olsem na, yumi taitim bun bilong kamapim pasin bilong wanbel na bilong strongim tingting bilong yumi olgeta wantaim.

²⁰ Yu no ken i larim kaikai i bagarapim wok bilong God. Tru, olgeta kaikai i klin. Tasol, sapos yu kaikaim sampela kaikai na dispela i mekim wanpela brata i pundaun, orait yu wokim rong. ²¹ Sapos pasin bilong yumi bilong kaikaim mit o bilong dring wain o bilong mekim narapela samting, i mekim brata bilong yumi i pundaun, orait em i gutpela yumi lusim ol dispela samting. ²² Tingting bilong yu bilong ol dispela samting bilong kaikai na dring na ol narapela samting, em i samting bilong yu na God. Sapos wanpela manmeri i sakim tingting bilong em yet, orait em i daunim em yet. Tasol God i blesim manmeri i no

mekim olsem. ²³ Sapos wanpela manmeri i tubel long sampela kaikai na em i go kaikaim dispela kaikai, orait em i daunim em yet. Long wanem, pasin bilong em i no pas wantaim bilip bilong em. Na pasin i no pas wantaim bilip em i sin pasin.

Krais i soim yumi gutpela pasin.

15 ¹ Yumi ol brata i gat strong, yumi gat wok bilong helpim ol brata i no gat strong long tingting bilong ol, na yumi no ken i tingim yumi yet tasol. ² Yumi wan wan yumi mas tingim brata bilong yumi na mekim wok i gutpela bilong em bilong strongim em. ³ Long wanem, Krais i no tingim Em yet. Nogat. Buk bilong God i tok olsem, "*Ol tok nogut ol manmeri i mekim long Yu, em Mi bin karim.*" (Buk Song 69:9) ⁴ Harim, olgeta samting ol man i bin raitim long Buk bilong God, ol i raitim bilong skulim yumi. Em olsem na Buk bilong God i stap bilong helpim yumi i stap strong long bihainim wei bilong God na bilong strongim tingting bilong yumi, bai yumi kisim gutpela tingting na wetim ol samting God i bin promisim. ⁵ God i ken i helpim yupela i stap strong long bihainim wei bilong Em na Em i ken i strongim tingting bilong yupela. Na Em i ken i helpim yupela i stap wanbel wantaim na mekim wok long bihainim BIKPELA. ⁶ Em olsem na, long wanpela tingting na long wanpela maus yupela ken i litimapim na givim biknem long God, Papa bilong BIKPELA bilong yumi Jisas Krais. ⁷ Krais i bin welkamim yupela, na long dispela as yupela mas welkamim olgeta brata bilong yupela. Na sapos yupela mekim olsem yupela bai givim biknem long God.

Krais Em i helpim bilong ol Juda na ol Jentail wantaim.

⁸ Mi tokim yupela, Krais i bin kamap wokboi nating bilong ol lain Juda, na dispela i soim olsem tok God i bin mekim i tru olgeta. Em olsem na God i kamapim tru olgeta promis Em i bin

mekim long ol tumbuna papa bilong ol, ⁹ na Em i bin marimari long ol lain Jentail na ol i litimapim nem bilong Em. Buk bilong God i tok olsem,

*"Long dispela as mi bai litimapim nem bilong Yu
namel long ol lain Jentail.*

Mi bai singim song bilong litimapim nem bilong Yu."

(2 Samuel 22:50, Buk Song 18:49)

¹⁰ Na gen Buk bilong God i tok olsem,

*"Yupela ol lain Jentail, yupela amamas wantaim ol lain bilong
God." (Lo 32:43)*

¹¹ Na gen Buk bilong God i tok olsem,

*"Yupela ol lain Jentail, yupela litimapim nem bilong BIKPELA.
Yupela olgeta lain manmeri,
yupela singim ol song bilong litimapim nem bilong Em."*

(Buk Song 117:1)

¹² Na gen Aisaia em i tok olsem,

*"Rop bilong Jesi bai kamapim nupela kru,
na Em bai kirap bilong bosim olgeta lain manmeri.*

Na ol lain Jentail bai putim laip bilong ol i go long han bilong Em."

(Aisaia 11:10)

¹³ God Em i as bilong laip i stap oltaim oltaim, na yupela save tingting strong na wetim dispela laip God i promisim yupela. Yupela save trastim Em, na Em i ken i pulimapim yupela long trupela amamas na trupela bel isi. Long strong bilong Holi Spirit yupela ken i bilip tru na tingting strong na wetim dispela laip God i promisim yupela.

Pol em i wok bilong helpim ol lain Jentail.

¹⁴ Ol brata bilong mi, mi yet mi tingim olsem yupela i bin kisim ol gutpela tingting na yupela i save mekim ol gutpela pasin. Na mi tingim olsem yupela i gat gutpela save long tok bilong God na yupela inap long skulim ol yupela yet. ¹⁵⁻¹⁶ God i mekim grasia long mi na Em i bin givim strong long mi bilong mekim wok bilong Krai Jisas bilong helpim ol lain Jentail. Em olsem na, mi mekim wok pris na mi autim gutnius bilong God long ol. Mi mekim olsem, bai ol lain Jentail i kamap olsem wanpela ofa God i laikim, na Holi Spirit i mekim ol i kamap stretpela long ai bilong God. Long dispela as tasol mi bin mekim sampela strongpela toktok long yupela insait long dispela pas bilong mi. Mi mekim olsem bilong kirapim tingting bilong yupela na yupela ken i skelim gen ol dispela tok bilong God.

¹⁷ Olsem na, mi save amamas long Krai Jisas na mi amamas long dispela wok God i givim mi. ¹⁸⁻¹⁹ Mi no ken i toktok long ol samting mi bin mekim. Nogat. Mi bai tokaut long ol samting Krai i bin mekim. Krai i bin givim strong bilong Holi Spirit long mi bilong mekim sampela kain mirakel na bilong strongim tok mi autim na bilong strongim wok mi mekim. Olsem na, Krai i bin yusim mi bilong kisim ol lain Jentail i kam na ol i bihainim God. Em olsem na mi bin autim olgeta gutnius bilong Krai long Jerusalem na i go olgeta long provins Ilirikum.

²⁰ Olgeta taim mi bin tingting strong long autim gutnius long hap we ol i no save long Krai. Long wanem, nogut mi mekim wok antap long wok bilong narapela wokman bilong God. ²¹ Em olsem na Buk bilong God i mekim dispela tok,

"Manmeri i no bin kisim tok bilong Em, bai ol i save, na manmeri i no bin harim tok bilong Em, bai ol i klia." (Aisaia 52:15)

Pol i laik go long Rom.

²² Olsem na, long dispela as, planti taim sampela samting i bin stopim mi long kam long yupela. ²³ Tasol nau mi no gat wok moa long ol dispela hap. Na tu, planti yia nau mi save tingting long kam lukim yupela. ²⁴ Olsem na, plen bilong mi i olsem, taim mi laik i go long Spen mi bai kam lukim yupela. Ples bilong yupela i stap long rot i go long Spen. Olsem na, taim mi laik i go long Spen mi bai kam na sindaun wantaim yupela liklik na amamas wantaim yupela. Na bihain yupela ken i helpim mi na mi bai lusim yupela na i go olgeta long Spen. ²⁵ Tasol nau mi mas i go long Jerusalem bilong givim helpim long ol manmeri bilong God i stap long dispela hap. ²⁶ Long wanem, ol manmeri bilong Masedonia na Akaia ol i bin bungim sampela mani bilong helpim ol manmeri bilong God i stap rabis long Jerusalem. ²⁷ Ol i amamas long bungim mani bilong helpim ol. Na dispela em i gutpela. Long wanem, ol lain Juda i amamas long givim gutnius bilong God long ol lain Jentail, na ol lain Jentail i ken amamas long givim hap mani long ol lain Juda. ²⁸ Em olsem na mi laik mekim dispela wok pastaim na karim mani i go long ol lain bilong God i stap long Jerusalem. Na bihain, taim mi laik i go long Spen, mi bai kam lukim yupela. ²⁹ Na mi klia olsem taim mi kam long yupela mi no inap i kam nating. Nogat. Mi bai karim ol gutpela blesim bilong Kraisis wantaim mi.

³⁰ Ol brata na susa, yupela klia pinis long wok bilong BIKPELA Jisas Kraisis bilong yumi, na yupela save long pasin bilong Holi Spirit bilong lavim manmeri. Yupela tingim dispela na yupela pas wantaim mi long dispela hat wok mi save mekim. Olsem na, yupela mas prea long mi long God. ³¹ Prea olsem God i ken i lukautim mi na ol man bilong ples Juda i no bilip ol i no ken i bagarapim mi. Na tu, prea olsem ol lain bilong God i stap long Jerusalem ol bai orait long wok bilong mi bilong helpim ol.

³² Yupela i mas mekim dispela kain prea, na sapos God i laik, mi ken i kisim amamas na kam long yupela na kisim win wantaim yupela. ³³ Na bel isi bilong God i ken i stap wantaim yupela. Tru tumas.

Pol i no lusim tingting long wan wan manmeri.

16 ¹ Mi laik mekim tok bilong sapatim Fibi, susa bilong yumi. Em i wokmeri nating bilong sios i stap long Senkria. ² Fibi em i bilong BIKPELA, na long pasin i fit bilong ol lain bilong God yupela mas kisim em. Na sapos em i nidim sampela helpim bilong yupela, orait yupela helpim em. Long wanem, planti manmeri i bin kisim helpim bilong Fibi na mi tu mi bin kisim helpim bilong em.

³ Na tokim Prisila wantaim Akwila olsem mi no lusim tingting long tupela. Tupela i wanwok bilong mi long wok bilong Jisas Krais. ⁴ Na taim tupela i bin helpim mi tupela i no bin tingting long laip bilong tupela yet. Nogat. Tupela i helpim tasol. Na em i no mi tasol i ken i tok tenkyu long tupela. Nogat. Ol sios bilong ol Jentail ol i ken i tok tenkyu na amamas long tupela.

⁵ Na tokim sios i save bung long haus bilong Prisila wantaim Akwila olsem mi no lusim tingting long ol. Na tokim gutpela pren bilong mi Epainetus olsem mi no lusim tingting long em. Em i fes man long provins Esia i bin lusim olupela bilip bilong em na i bihainim Krais.

⁶ Na tokim Maria olsem mi no lusim tingting long em. Em i bin mekim bikpela wok bilong helpim yupela.

⁷ Na tokim Andronikus wantaim Junias olsem mi no lusim tingting long tupela. Tupela i wan blut bilong mi na tupela i bin i stap long kalabus wantaim mi. Namel long ol aposel

tupela i kamap bikpela. Na tupela i bin pas long Krai paslain long mi.

⁸ Na tokim Ampliatu olsem mi no lusim tingting long em. Em i bilong BIKPELA na mi laikim em tumas.

⁹ Na tokim Urbanus olsem mi no lusim tingting long em. Em i wanwok bilong mi long wok bilong Krai. Na tu, tokim gutpela pren bilong mi Stakis olsem mi no lusim tingting long em.

¹⁰ Na tokim Apeles olsem mi no lusim tingting long em. Em i bin fesim planti hevi na em i no givap. Olsem na, dispela i soim olsem em i trupela man bilong Krai.

Na tokim ol manmeri i stap long haus bilong Aristobulus olsem mi no lusim tingting long ol.

¹¹ Na tokim Herodion olsem mi no lusim tingting long em. Em i wanblut bilong mi.

Na tokim ol manmeri i pas long BIKPELA na i stap long haus bilong Narsisus olsem mi no lusim tingting long ol.

¹² Na tokim Trifina wantaim Trifosa olsem mi no lusim tingting long tupela. Dispela tupela meri i save wokhat long bihainim BIKPELA.

Na tokim gutpela pren bilong mi Persis olsem mi no lusim tingting long em. Em tu em i meri i bin mekim bikpela wok long bihainim BIKPELA.

¹³ Na tokim Rufus olsem mi no lusim tingting long em. Krai i bin makim em na em i pas long Krai. Na tu, tokim mama bilong em olsem mi no lusim tingting long em. Em i bin i stap olsem mama bilong mi tu.

¹⁴ Na tokim Asinkritus, Flegon, Hermes, Patrobas, Hermas wantaim ol brata na susa i stap wantaim ol olsem mi no lusim tingting long ol.

¹⁵ Na tokim Filologus, Julia, Nereus wantaim susa bilong em, na Olimpas wantaim olgeta lain bilong God i stap wantaim ol olsem mi no lusim tingting long ol.

¹⁶ Na taim yupela bungim narapela brata o susa yupela ken i givim kis i holi long ol.

Na mi ken i tokim yupela olsem, ol wan wan sios bilong Krai ol i no lusim tingting long yupela.

Las stia tok bilong Pol.

¹⁷ Ol brata, mi laik tokim yupela olsem, yupela mas lukaut long ol lain i save mekim pasin bilong brukim sios bilong yupela. Yupela kisim gutpela skul pinis long tok bilong God, tasol sampela manmeri bai kisim dispela tok i go long narapela sait olgeta. Yupela mas i stap longwe long ol dispela kain manmeri. ¹⁸ Long wanem, ol i no mekim wok bilong Krai, BIKPELA bilong yumi. Nogat. Ol i mekim wok bilong bihainim laik bilong ol yet. Olsem na, ol i save mekim tok giaman na tok gris bilong giamanim tingting bilong ol manmeri i no yusim het. ¹⁹ Olgeta taim yupela bihainim gut ol tok bilong God na olgeta manmeri nabaut ol i harim pinis dispela stori bilong pasin bilong yupela. Olsem na, taim mi tingting long yupela mi amamas. Tasol, yupela mas yusim het na save gut long ol samting i gutpela, na yupela lusim tingting long ol samting i nogut.

²⁰ Klostu nau dispela God bilong pasin bel isi, Em bai krungutim Satan aninit long lek bilong yupela.

Na Jisas, BIKPELA bilong yumi, i ken i mekim grasia long yupela.

²¹ Timoti, wanwok bilong mi, em i salim tok olsem, "Mi no lusim tingting long yupela." Na Lusius na Jeson na Sosipater, ol i wan blut bilong mi, na ol tu i salim tok olsem, "Mipela no lusim tingting long yupela."

²² Mi, Tertius, mi bin raitim dispela pas bilong Pol, na mi tu mi no lusim tingting long yupela bilong BIKPELA.

²³⁻²⁴ Na Gaius em i salim tok olsem, "Mi no lusim tingting long yupela." Em i bin amamas na mekim gutpela wok bilong lukautim mi wantaim olgeta manmeri bilong sios bilong hia.

Erastus na Kwartus, tupela i salim tok olsem, "Mitupela no lusim tingting long yupela." Erastus em i wokman bilong gavman na em i mekim wok bilong bosim ol Pablik Wok bilong taun.

Litimapim nem bilong God.

²⁵⁻²⁷ Orait, litimapim nem bilong God. Em yet Em inap mekim yupela strong. Mi bin autim gutnius bilong mi na tokim yupela long wok bilong Jisas Krai. Na God bai yusim dispela gutnius bilong strongim yupela. Pastaim sampela samting bilong God i hait. Tasol, dispela God bilong i stap oltaim Em i bin tokaut olsem, "Dispela samting i hait i mas kamap ples klia na olgeta manmeri long olgeta hap ol i ken i bilipim na bihainim Mi." Olsem na, God i givim Tok bilong Em i kam long yumi na long dispela tok God i mekim hait samting bilong Em i kamap ples klia. Litimapim nem bilong God. Dispela wanpela God i gat save tru. Na long dispela wok God i mekim long han bilong Jisas Krai, God i mas kisim bikpela bikpela nem oltaim oltaim. Tru tumas.